

# رحلة كمبيو

بقلم /  
خالد نجيب



رحلة مكبىو

حنان جنيح

بسم الله الرحمن الرحيم



الهيئة العامة لقصور الثقافة  
إقليم القناة وسيناء الثقافي



مطبوعات  
إقليم القناة وسيناء الثقافي



---

رئيس مجلس الإدارة  
عبد الرحمن نور الدين



رئيس التحرير  
قاسم مسعد عليوة



مستشارا التحرير  
محمد الراوى  
د. سامح درويش

---



تصميم الغلاف والإخراج الفني  
عبد الرحمن نور الدين





الهيئة العامة لقصور الثقافة  
إقليم القناة وسيناء الثقافي

# رحلة كهيرو ليه يا أسد؟

مسرحيتان للأطفال

خالد بخيت





## للأصدقاء الصغار نهدي هذه الابداعات

عندما عرضت فكرة أن نخصص كل مطبوعات الاقليم خلال هذا العام للإبداع المخصص للطفل، على الأصدقاء في هيئة تحرير مطبوعاتنا ، وعندما تحمسوا معى للفكرة، كان تصورنا أن ما سنحصل عليه من إنتاج متميز يستحق النشر لن يزيد عن ثلاثة أو أربعة كتب على الأكثر لندرة المبدعين فى هذا المجال .

إلا أننا فوجئنا بعد أن أعلننا عن المشروع بكم هائل من الانتاج سواء فى المسرح أو القصة أو الشعر أو حتى الرواية والسيناريو ..  
وبدأ الأصدقاء يقرأون ليختاروا لنا ما سننشره ، ووجدتهم يضعون أمامى ثمانية كتب مرة واحدة تضم إنتاجاً لاثنى عشر أديبا من الاقليم ، ويتحمس الصديق قاسم عليوه قائلاً.. «أنت الذى اخترت وعليك أن تسعى لطبع كل هذا، فالانتاج متميز ويغضى كافة مجالات الابداع».

ووجدتني بدورى أدفع بالأعمال كلها للمطبعة بعد أن استمتعت أنا أيضا بقراءتها، وهانحن صديقى القارئ الصغير نضعها بين يديك، وهى ليست بكثيرة عليك .  
فأنت من سيرسم لنا مستقبلنا المشرق الذى نأمل فيه، أما من أمتعونا بكتاباتهم وابداعهم فلهم كل الشكر لأنهم يؤكدون لنا أن مصر العظيمة بخير ما دام فيها كل هؤلاء الأبناء المحبون .

**عبد الرحمن نور الدين**  
رئيس اقليم القناة وسيناء الثقافى



رحلہ کمیو



## الشخصيات

- ١ - مستر كمبيو
- ٢ - مدير المدرسة
- ٣ - لهلوبة
- ٤ - فوزى
- ٥ - الطلبة
- ٦ - الملك الكمبيوتر
- ٧ - الوزير الكمبيوتر
- ٨ - مجموعة مملكة الكمبيوتر
- ٩ - المعلم الفرعونى
- ١٠ - مجموعة الفراعنة



## اللوحة الأولى

المكان : فصل فى مدرسة من مدارس قرى مصر  
تدخل مجموعة من الأطفال يحملون أجهزة كمبيوتر لتوزيعها على المسرح فى  
استعراض غنائى.  
المدير : (يدخل) برفوا يا أولاد عمل رائع كلكم حلوين كلكم ممتازين الحمد لله. دلوقتى أقدر  
أقول أننا مستعدين كل حاجة فى مكانها الصحيح، برفوا يا أولاد.  
لهلويه : دلوقتى يا أستاذ ح نعمل إيه ؟  
المدير : نرتاح طبعاً يا لهلويه  
فوزى : ايوه يا أستاذ إحنا تعبنا قوى. أجهزة الكمبيوتر كانت ثقيلة قوى  
المدير : طيب .. طيب.. تحبوا نرتاح قد إيه ؟  
فوزى : نرتاح .. نرتاح.. سنه يا أستاذ  
لهلويه : سنه ده كثير قوى  
فوزى : طيب نرتاح شهر واحد  
لهلويه : شهر برضه كثير إحنا ح نرتاح.. نص ساعة  
المدير : وبعد الراحة يا لهلويه  
لهلويه : نتجمع وبسرعة فى الفصل يا أستاذ  
المدير : وبعد ماننتجمع فى الفصل  
طفل : نقعد بأدب ونظام يا أستاذ  
المدير : وبعد ما نقعد بأدب ونظام يا أستاذ.. أنا بقول بعد ما نقعد بأدب ونظام يا فوزى.  
فوزى : آآآ  
المدير : أنت لسه بتقول آآ  
فوزى : آآ  
المدير : بلاش آآ دى.. قول حاجة ثانية  
فوزى : أه .. أه..

**المدير :** يعنى تخلص من أأأ ندخل فى آه .. اه .. آه وبعدين معاك يا فوزى نايم طول السنه.. ودرجات ضعيفة ومش شاطر.. وكمان النهارده؟ لا يا فوزى النهارده لازم تصحى النهارده يوم مش عادى.. النهارده يوم رائع.

**لهلويه :** وعمل رائع يا أستاذ

**المدير :** برافو يا لهلويه. عارف يا فوزى ح يجرى إيه انهارده فى مدرستا

**فوزى :** أأأأ

**المدير :** تانى يا فوزى اصحى شويه المدرسة من شهرين بتستعد لاستقبال هذا الحدث العظيم

**لهلويه :** حدث رائع يا أستاذ

**المدير :** برافو يا لهلويه.. شهرين استعداد وفوزى مش عارف النهارده إيه؟

**لهلويه :** سبت رائع يا أستاذ

**المدير :** برافو يا لهلويه.. بعد أن تم اختيار قريتنا (قرية ميت فل) لتنفيذ أول تجربة للتعليم بالكمبيوتر فى القرى تمنيت من كل قلبى أن يتم اختيار مدرستا وحينما تم اختيار مدرستا (مدرسة ميت فل الإعدادية المشتركة) كلفنى السيد مدير المنطقة.

**لهلويه :** الأستاذ إبراهيم حلوة الرائع يا أستاذ

**المدير :** برافو برافو يا لهلويه .. حافظة ومش ناسيه لكن مش وقته أنا كنت بقول إيه.. أيوه.. كلفنى مدير المنطقة اختيار احسن واشطر فصل ليتم فيه تجربة التعلم بالكمبيوتر.. ثم بعد ذلك تعميم التجربة فى المدرسة.. وبعد مجهود وبحث وكر وفر وقع اختيارى على فصل ٢/٢.

**المدير :** شكراً .. شكراً يا أولاد لا داعى للهتاف والتصفيق.. لا داعى للهتاف .. الهتاف. الهتاف (بغضب) الهتاف .

**طفل :** عاش الأستاذ عبده مدير المدرسة

**الجميع :** عاش الأستاذ عبده

**طفل :** عاش أستاذ القرن الواحد والعشرين

**الجميع :** عاش أستاذ القرن

**طفل :** عاش أستاذ عصر الكمبيوتر



**الجميع :** عاش أستاذ عصر الكمبيوتر

**طفل :** كمبيوتر ايه ؟

**الجميع :** كمبيوتر

**المدير :** أنا عايز أفتخر بكم. ترفعوا راسي قدام المسؤولين، وخصوصاً أن الوزارة ح ترسل مدرستنا خبير فى الكمبيوتر ليتولى عملية التدريس مش عاوز التجربة تفشل وتكون مدرستنا مسئولة بسبب الفشل.

**لهلوية :** اظمن يا أستاذ لكن الأستاذ الأجنبى هيوصل امتى المدرسة

**المدير :** المدرسة فى انتظاره انهاردة يا لهلوية

**لهلوية :** النهارده

**المدير :** الخبير الأجنبى ح يوصل النهارده فى أى لحظة علشان كده أنا عايزكم دايما فى حالة استعداد

**الطفل :** أحنأ مستعدين يا أستاذ

**فوزى :** أأأ

**المدير :** أأأ.. لسه بتقول أأأ ربنا يستر وتنجح التجربة ربنا يستر .. ربنا يستر (يخرج)

**فوزى :** قال كمبيوتر قال يعنى احنا ناقصين الكمبيوتر ده كمان.. مش كفاية المواد اللي بندرسها ونحفظها طول السنة عربى.. رياضة.. انجليزى.. تاريخ وغيره.. كمان كمبيوتر؟

**لهلوية :** يا جاهل .. يا جاهل .

**فوزى :** جاهل

**لهلوية :** طبعا .. جاهل وأمى كمان

**فوزى :** أمى. فى المدرسة فى الإعدادية. ومعايا الابتدائية وتقولى على أمى.

**لهلوية :** طبعا أصل الأمى فى عصرنا مش هو اللي مايعرفش يقرأ ويكتب. الأمى هو اللي ما يعرفش الكمبيوتر.

**طفل :** الأمى اللي ما يعرفش كمبيوتر يا لهلوية؟

**لهلوية:** الكمبيوتر هو لغة العصر

**فوزى :** مش أنا لوحدى اللي ما يعرفش كمبيوتر. يعنى مش أنا لوحدى الأمى أحنأ كلنا

ما بنعرفش كمبيوتر..

**لهلوبة :** علشان كده الوزارة اشترت أجهزة الكمبيوتر. وانتدبت خبير الكمبيوتر علشان

تقضى على أمية الجيل الجديد.

**فوزى :** لكن أنا شايف اننا مش محتاجين الكمبيوتر ده.

**لهلوبة :** معقول يا فوزى كل أطفال العالم دلوقت بيتعلموا الكمبيوتر.

**فوزى :** احنا كفاية علينا المواد بنتعلمها.

**طفل :** والكمبيوتر يا فوزى.

**فوزى :** مش لما نقدر على دروسنا الأول

**لهلوبة :** الكمبيوتر حيسهل علينا كل المواد.

**طفل :** يعنى إيه يا لهلوبة.

**لهلوبة :** يعنى إحنا نقدر نتعلم الحساب بالكمبيوتر. نتعلم القراية بالكمبيوتر.

**طفل :** نتعلم كل المواد بالكمبيوتر.

**فوزى :** بس احنا ما فيش عندنا وقت نتعلم الكمبيوتر.

**طفل :** أيوه يا لهلوبة. مافيش عندنا وقت.

**فوزى :** إحنا بنذاكر شوية وبنعمل الواجب شوية ونلعب شوية.

**طفل :** أيوه يا لهلوبة يعنى كده مش هنقدر نذاكر.

**فوزى :** ومش هنقدر نعمل الواجب.

**طفل :** وكمان مش هنقدر نلعب.

**فوزى :** لا. لا. لا. للكمبيوتر.

**الجميع :** لا. لا للكمبيوتر.

**لهلوبة :** بكرة تعرف يا فوزى وتعرفوا كلكم أهمية الكمبيوتر (تخرج).

(يجرى خلفها الأولاد) (فوزى على المسرح بمفرده)

**الجميع :** لهلوبة. يا لهلوبة. يا لهلوبة.

**فوزى :** قال بكرة أعرف أهمية الكمبيوتر ده مالوش أى أهمية. ده تضییع وقت وكلام فارغ

(يقف أمام جهاز الكمبيوتر).

شوية مفاتيح أنا ممكن أشغلها من غير ما أتعلم من غير مدرس يعلمنى (يجلس)

أنا خايف من إيه؟. لما اجرّب وأضغط على أى مفتاح من المفاتيح.  
لكن أضغط على أى مفتاح. المفتاح ده. لا المفتاح ده. لا يبقى هو ده. ولا ده. أنا  
أحسن حاجة أضغط على كل المفاتيح. (يضغط).  
(يضغط على المفاتيح وهو يضحك ويغنى)  
(تظهر ألوان وأشكال. ويتغير جو المكان)

لهلوية : بتعمل إيه يا فوزى؟

فوزى: تعالى يا لهلوية أنا خلاص اتعلمت الكمبيوتر.

لهلوية: اتعلمت الكمبيوتر

فوزى: حتى شوفى بنفسك

لهلوية: أبعد عن الكمبيوتر يا فوزى.

فوزى: أبعد ليه يا لهلوية أنا خلاص اتعلمت الكمبيوتر.

لهلوية: اتعلمت من قبل ما يوصل المدرس الأجنبى.

فوزى: أنا مش محتاج لمدرس باقولك اتعلمت خلاص لوحدى.

لهلوية: يا فوزى انت كده هتعتل وتخسر الكمبيوتر.

فوزى : اعطّل وأخسر أزاى بعد ما اتعلمت يا لهلوية.

لهلوية : بقولك أبعد عن الكمبيوتر يا فوزى.

فوزى: اتفرجى علىّ وأنا باشغل الكمبيوتر.

لهلوية :أبعد يا فوزى

فوزى : اتفرجى يا لهلوية اتفرجى

(المسرح يأخذ ألوان مختلفة)

المدير : (يدخل) إيه. فى إيه. إيه اللى بيحصل فى الفصل جرى إيه.. جرى إيه؟

(دخول مجموعة من الأطفال)

(الجميع فى حالة من الفوضى والذعر على المسرح)

المدير : بتعمل إيه عندك يا فوزى (يبتعد فوزى عن الجهاز).

لهلوية : بيلعب فى الجهاز يا أستاذ.

فوزى: يا فتانة يا لهلوية

**لهلوية:** لو سمحت انا مش فتانة.  
**المدير:** مش عايز اسمع صوت. كل طالب يقعد مكانه الأستاذ كمبيو.. وصل المدرسة.  
**لهلوية:** مين الأستاذ كمبيو يا أستاذ؟  
**المدير:** الأستاذ كمبيو الخبير الأجنبي معلم الكمبيوتر.  
**لهلوية:** هو فين يا أستاذ  
**المدير:** أدب.. نظام. احترام... أتفضل يا مستر كمبيو  
(يدخل كمبيو.. طفل تقريباً فى عمر أطفال المدرسة)  
(يرتدى نظارة. يمسك حقيبة. يأتى بأفعال الكبار)  
(الأطفال يضحكون. يهمسون)  
**المدير:** أدب. احترام أحب اقدم لكم معلمكم المستر كمبيو  
(الأطفال يضحكون)  
**كمبيو:** الأولاد بيضحكوا من ايه  
**المدير:** مش عارف يا مستر  
**كمبيو:** غريبة. نفس الضحكة اللى شفتها من حضرتك لحظة مادخلت مكتبك. هي الحكاية  
إيه. اتكلموا يا أولاد.  
**لهلوية:** حضرتك عندك كام سنة يا مستر.  
**كمبيو:** عمرى قد إيه. أنا اتأخرت سنة فى الدراسة لكن كانت لظروف.  
**المدير:** مش القصد يا مستر.  
**كمبيو:** اه. فهمت لكن أنا مش شايف إن ده سبب علشان الضحك.  
**المدير:** أيوه يا مستر. لكن افكر إن حضرتك مش هتقدر تتعامل وتوصل المعلومات للأطفال  
اللى فى سنك.  
**كمبيو:** يضحك  
**المدير:** حضرتك يا مستر بتضحك من ايه دلوقت؟  
**كمبيو:** أطفال. الطفولة متأخرة قوى عندكم فى السن ده ولسه بتقول عليهم أطفال.  
**المدير:** طب المفاعيص دول نقول عليهم إيه.  
**طفل:** احنا مش مفاعيص يا أستاذ

المدير: اخرس يا مفعوص  
كُمبيو : من فضلكم المسألة مش مسألة سن. مش مسألة مسميات طفل. شاب. راجل.  
المسألة أعمق من كل ده.

(تصفيق من الأطفال)

لهلوبة: والله ما انتم فاهمين حاجة.  
كمبيو: أفهمكم وأشرح لكم بالتفصيل. عندكم مثلا الجهاز ده.  
لهلوبة : جهاز الكمبيوتر يا أستاذ؟  
كمبيو: برافو جهاز الكمبيوتر علشان نقدر نستفاد منه لازم الأول نغذيه بالمعلومات. وأى سن أو أى مرحلة عمرية على قدر ما نغذيها بالمعلومات. نستفيد منها استفادة عظيمة.

فوزى: حضرتك تقصد يا مستر إننا نتغذى زى الكمبيوتر معلومات.

كمبيو : أيوه

فوزى: بيقول أيوه. أيوه إزاي. يعنى احنا زى الكمبيوتر.

كمبيو : بالتأكيد. الكمبيوتر من غير معلومات لا يفيد. يعنى لازم نتغذى بالمعلومات.

طفل : نتغذى معلومات. طب والفل؟

كمبيو: فل؟

طفل: اللحمة

كمبيو: لحمة ؟

فوزى : الأكل. الأمل يا مستر. البيض. اللحمة والخضار والفاكهة

لهلوبة: افهم امال يا فوزى

طفل : يفهم ايه يا لهلوبة؟

لهلوبة : المستر بيكلّم عن غذاء العقل مش غذاء المعدة.

فوزى : غذاء المعدة ؟

كمبيو: غذاء العقل لا يقل أهمية عن غذاء المعدة وأنا عايزكم تحبو غذاء العقل.. المعلومات

زى ما بتحبو اللحمة والفل والفاكهة.

المدير : تمام يا مستر تمام.

**كمبيو :** واحب اطمئنك يا أستاذ إن مسألة السن المتقارب بينى وبين الأولاد لصالح العملية التعليمية مش ضدها. احنا جيل واحد وعلشان كده أقدر أوصل ليهم المعلومات بالطريقة اللى تناسبهم.

**المدير :** أنا ما قدرش غير إنى أنفذ تعليمات الوزارة وحضرتك مرسل عن طريق الوزارة. كبير. صغير. الفصل قدامك أهه. اتفضل إبدأ العمل يا مستر كمبيو.

**كمبيو :** أشكرك يا أستاذ

**المدير :** أنا عاوز تعاون تام مع مستر كمبيو. مفهوم

**الجميع :** مفهوم يا أستاذ

**المدير :** ربنا يوفقكم. ربنا يستر (ويخرج)

**فوزى :** أنا مش فاهم. تبقى ازاى أستاذ وانت عمرك قد عمرنا وسنك من سننا.

**كمبيو :** مش مشكلة فى البلاد المتحضرة مكانة الفرد لا تتحدد بالعمر اللى بيحصل فيه العلم. لكن مكانة الفرد بالكمية التي حصلها من العلم.

**طفل :** انا مش فاهم.

**كمبيو :** ببساطة مش مهم عمرك قد ايه. الأهم اتعلمت قد ايه

**طفل :** مش مهم عمرك قد ايه؟

**كمبيو :** الأهم اتعلمت قد ايه

(استعراض. مش مهم عمرك قد ايه الأهم اتعلمت قد ايه)

**كمبيو :** دلوقت نقدر نبدأ أول حصّة

(دخول مجموعة مختلفة فى المظهر)

**المجموعة :** قبل ما تبدأ يا أستاذ. لينا معاك كلمتين.

**كمبيو :** انتم مين. وليه عن الحصّة متأخرين

**الكتاب المدرسى :** (طفل فى مظهر غير لائق)

احنا أسفين أسفين

**كمبيو :** انت مين وليه زعلان؟

**الكتاب المدرسى :** مش عارفنى يا أستاذ

**كمبيو :** شكك مش غريب.

**الكتاب المدرسى:** أنا الكتاب المدرسى  
**كمبيو :** مستحيل، حصلك إيه ؟ .. كان زمان منظرك جميل وورقك قليل ومعلوماتك سهلة وبسيطة.

**الكتاب المدرسى:** (يغنى فى شكل استعراض. ليظهر سلبيات الكتاب المدرسى)

**كمبيو :** وانت مين، وليه زعلان؟

**الواجبات :** (فتاة حجمها كبير كبير جدا)

(أنا الواجبات المنزلية يا أستاذ)

**كمبيو :** بس انت ثقيلة قوى

**الواجبات:** (تغنى فى شكل استعراضى لتظهر إيجابيات الواجبات المنزلية)

(بعض نماذج من سلبيات العملية التعليمية وللقائمين على العمل الحق فى ذكر

أسباب أخرى. فى قالب غنائى استعراضى).

**كمبيو :** كفاية. كفاية تأخير دلوقت نبدأ الحصة وأول حاجة أحب أقولها عن الكمبيوتر.

الكمبيوتر بالظبط عامل زى المصنع.

**لهلوية:** مصنع يا أستاذ؟

**كمبيو :** أى مصنع علشان ينتج ويخرج إنتاج طبعا محتاج للخامات الأولية.

**لهلوية:** معلومات يا أستاذ.

**كمبيو :** برافو عليكى والكمبيوتر مصنع وخاماته الأولية هى المعلومات.

**طفل :** أنا لسة مش فاهم.

**كمبيو :** دلوقت ارسم لكم شكل يوضح إزاي نقدر نحصل على معلومات من مصنع الكمبيوتر.

(كُمبيو يرسم. يتغير المسرح. دخول مجموعة من الآلات الكمبيوتر. وفى قالب

استعراضى تقوم مجموعة الكمبيوتر بالرقص والغناء. لبيان أهمية الكمبيوتر..

استعراض الكمبيوتر).

**كمبيو :** ودلوقت نبدأ الشرح العملى على جهاز الكمبيوتر (يجلس أمام الكمبيوتر)

مستحيل.. مستحيل.

**لهلوية :** حصل إيه يا مستر ؟

طفل: جرى إيه ؟  
كمبيو: حاجة مرعبة، حاجة خطيرة.  
طفل: فيه إيه يا مستر ؟  
طفل: هو جرى إيه؟  
كمبيو: الكمبيوتر. الكمبيوتر  
لهلوية: حصل إيه للكمبيوتر؟  
كمبيو: فيه حاجة غلط. غلط كبير. غلط فظيع  
طفل: غلط كبير ؟!  
طفل: غلط فظيع ؟!  
كمبيو: فيه ايد لعبت فى الكمبيوتر. فى حد شغل الكمبيوتر  
طفل: مش ممكن يا مستر  
كمبيو: هى دى الحقيقة. فيه حد شغل الكمبيوتر وهو ما بيعرفش فى الكمبيوتر. وهو أمى  
كمبيوتر  
لهلوية: فوزى.  
فوزى: أنا ما عرفش حاجة  
كمبيو: مستحيل. مستحيل.  
لهلوية: إنت يا فوزى.  
فوزى: قلتلك ما عرفش حاجة. ما أعرفش حاجة.  
كمبيو: مستحيل. مستحيل.  
لهلوية: رايح فين يا مستر ؟  
كمبيو: رايح أقابل مدير المدرسة. أنا متأكد إن حد شغل الكمبيوتر وهو أمى. أمى  
كمبيوتر. مستحيل، مستحيل (يخرج)  
فوزى: إيه. فيه إيه. ما لكم بتبصولى كده ليه؟  
لهلوية: انت اللى لعبت فى الكمبيوتر.  
فوزى: وفيها إيه لما أشغل الكمبيوتر؟  
طفل: لكن انت يا فوزى أمى كمبيوتر



**فوزى :** أمى. أمى. أنا مش أمى أمى. انا متعلم واللا خلاص يعنى علشان الكمبيوتر ابقى  
أمى وبعدين أنا بافهم فى كل حاجة. وأعرف كمان أشغل الكمبيوتر. حتى تعالوا  
اتفرجوا.

**لهلوية :** ابعد عن الكمبيوتر وكفاية اللى جرى

**فوزى :** بس بلاش خوف وتعالوا اتفرجوا

(يجلس. يلعب بالكمبيوتر)

(إضاءة مختلفة سريعة. أجهزة الكمبيوتر تتحرك. المسرح يأخذ شكلاً آخر للدخول

فى مملكة الكمبيوتر)

(ذعر وخوف من مجموعة الأطفال)

**طفل :** فى إيه؟ حصل إيه؟

إيه اللى جرى؟

أنا خايف .

وأنا خايفة

ليه اللى حصل؟

ايه اللى جرى ؟

**الجميع:** احنا فين. احنا فين. فين

**صوت :** (صوت قوى مجسم) انتم فى مملكة الكمبيوتر.

**المجموعة :** مملكة إيه ؟

**صوت :** مملكة الكمبيوتر.

**الجميع :** الحقونا !!!!!!!

## اللوحة الثانية

(المنظر عبارة عن كمبيوتر كبير - نحن - داخل مملكة الكمبيوتر.....)

(مجموعة الأطفال يجلسون فى ركن خائفين)

(المكان كله حرس كمبيوتر. كل منهم عبارة عن كمبيوتر متحرك)

(يدخل الوزير الكمبيوتر)

**كمبيوتر ١:** وزير مملكة الكمبيوتر

**الوزير :** إيه اللى حصل فى مملكتنا النهاردة ؟

**كمبيوتر ١:** مملكة الكمبيوتر

**كمبيوتر ٢:** مخلوقات غريبة تسלט للمملكة يا وزير

**الوزير :** مخلوقات غريبة ؟

**كمبيوتر ٣:** مخلوقات معروفة يا وزير. مخلوقات من الإنس بس هو الكمبيوتر الصغير مش عارف.

**الوزير :** مش عارف؟ (موسيقى قوية)

**الجميع :** مش عارف

**الوزير :** فيه كمبيوتر داخل المملكة مش عارف. يتقدم للمحاكمة فى الحال.

**كمبيوتر ٣:** الكمبيوتر لسه صغير يا وزير المملكة

**الوزير :** شغلنا هو المعرفة. صغير كان ولا كبير، كلنا دايم عارفين واللى مش عارف يتحاكم بتهمة عدم المعرفة.

**كمبيوتر ٢:** تهمة عدم المعرفة.

**كمبيوتر ٣:** لكن دى تهمة خطيرة وكبيرة.

**كمبيوتر ١:** وعقوبتها كبيرة.

**كمبيوتر ٢:** السماح يا وزير مملكة الكمبيوتر

**الوزير :** أنا ممكن أسامح فى جرائم كثير. لكن مش ممكن أسامح فى جرم خطير وكبير، جرم عدم المعرفة، حراس الكمبيوتر.

حرس كمبيوتر : أوامر السيد الوزير .  
الوزير : اسحبوا الكمبيوتر الصغير على سجن الملكة .  
كمبيوتر ٢ : السجن .  
الوزير : وخرجوا من عقله كل المعلومات .  
كمبيوتر ٢ : كده ممكن الكمبيوتر الصغير يعطل  
كمبيوتر ٣ : ممكن يخسر  
كمبيوتر ٤ : ممكن يموت من غير ما يتنفس معلومات  
الوزير : اسحبوا متهم عدم المعرفة على السجن . و ينتظر  
المحاكمة فى خلال اسبوع . اسحبوا المتهم  
(حرس الكمبيوتر يتوجهون بالكمبيوتر الصغير الى السجن)  
كمبيوتر ١ : المتهمين من الإنس يا وزير الكمبيوتر  
الوزير : هم فين  
كمبيوتر ١ : قبضنا عليهم يا وزير  
الوزير : وخزائن المعرفة فى الملكة  
كمبيوتر ٢ : بخير يا وزير  
الوزير : ماسرقوش من معرفتنا أى معلومات  
كمبيوتر ٣ : ولا معلومة واحدة ناقصة يا وزير  
الوزير : جميل جميل  
كمبيوتر ٤ : يأمر وزير الملكة بعرض المتهمين على جلالته  
الوزير : بعدين .. بعدين الأول سمع تقارير معرفة اليوم  
كمبيوتر ١ : (ينادى) تقارير معرفه اليوم للعرض على الوزير  
الجميع : (نداء) تقارير المعرفة  
كمبيوتر ٢ : الأستاذ الأديب / نجيب محفوظ يفوز بجائزة نوبل للآداب .  
(تصفيق)  
كمبيوتر ٣ : الأستاذ العالم / احمد زويل يفوز بجائزة نوبل للعلوم  
(تصفيق)

**الوزير :** نجيب محفوظ واحمد زويل مصريان

**كمبيوتر ٤ :** المعرفة تقدمت فى مصر يا وزير

**الوزير :** جميل .. جميل

(للقائمين على العمل . اختيار بعض المعلومات لتقدم فى صوره تقارير للوزير)

(من الممكن تغير المعلومات يوميا)

**كمبيوتر ١ :** انتهت تقارير اليوم يا وزير

**الوزير :** ودلوقت حصه المراجعة اليومية. عندما نجح الإنسان فى اختراعنا وتطويرنا توسع فى استخدامتنا فى المجالات المختلفه مثل ...

**كمبيوتر :** مثل المجال الزراعى

**كمبيوتر :** المجال التجارى

**كمبيوتر :** الصناعى

**كمبيوتر :** والادارة ونظم المعلومات

**كمبيوتر :** والبنوك والتعليم والطب

**كمبيوتر :** وجميع المجالات

**الوزير :** ودلوقت عايز اطمن على تكوينات الملكة .

**كمبيوتر :** تكوين الكمبيوتر

**كمبيوتر :** انا الوحده الرئيسيه فى تكوين الكمبيوتر وباشتمل على المكونات الداخلة فى

تكوين الحاسب ويطلق على وحده معالجة البيانات المركزية

**الوزير :** اشرحى مكونات وحدتك.

**كمبيوتر :** انا بتكون من. (وحده تخزين رئيسيه واسمها الذاكره ووحده حسابيه ومنطقية ووحده تحكم)

(تصفيق)

**كمبيوتر :** وانا الوحده الفرعية وأنا عباره عن التجهيزات الاضافية للحاسب

**الوزير :** اشرح مكونات وحدتك

**كمبيوتر :** أنا متكون من وحدات إدخال تستخدم لإدخال البيانات

ووحدة إخراج وتستخدم لاستقبال النتائج ووحدة أخرى تصلح للإدخال والإخراج

(تصفیق)

**الوزير :** ودلوقت عايز اعرف حكاية المتهمين من الأنس بالتسلل لمملكتنا . وكانوا طالبين إيه مننا ؟

**كمبيوتر :** أكيد المعرفة

**الوزير :** نطردهم من غير مانحاكمهم .

**كمبيوتر :** المعذرة يا وزير

**الوزير :** تتم محاكمتهم على تهمتين التهمة الأولى . عدم المعرفة

**كمبيوتر :** والتهمة الثانية يا وزير ؟

**الوزير :** محاولة سرقة المعرفة

**كمبيوتر :** التهمة الأولى خطيرة وعقوبتها الحبس فى غرفة باهرة الضوء .

**كمبيوتر :** التهمة الثانية خطيرة وعقوبتها النفى فى جزيرة بعيدة

**كمبيوتر :** لكن محاكمة الأنس مش من اختصاص وزير المملكة . محاكمتهم من اختصاص

جلاله الملك

**الوزير :** وعشان نحقق العدل فى الحكم . والعدل معرفة واللى يعرف العدل عمره ما يظلم.

يا حارس

**حارس :** أوامر وزير المملكة

**الوزير :** أستاذن ملك الكمبيوتر فى الحضور لجلسة المحاكمة

**حارس :** (يخرج)

**فوزى :** إحنا فين إيه هو المكان الغريب ده ؟

**طفل :** أنا أول مرة أشوف مكان زى ده

**طفل :** إحنا وصلنا هنا ازاي ؟

**لهلويه :** المهم دلوقت نعرف إحنا فين

**طفل :** مكان عجيب كله شاشات

**طفل :** وانوار والوان

**فوزى :** ومفاتيح مفاتيح كثير

**لهلويه :** بس أنا فاكراه إنى شفت المفاتيح دى قبل كده

**طفل :** شكلها مش غريب علينا يا لهلويه  
**لهلويه :** لكن إحنا مش عارفين المفاتيح دى نعمل بيها إيه  
**طفل :** ولا عارفين ازاي بتشتغل  
**لهلويه :** افكرت . دلوقت افكرت. المفاتيح دى. مفاتيح الكمبيوتر  
**فوزى :** مفاتيح الكمبيوتر  
**طفل :** لكن إحنا ما نعرفش نشغله يا لهلويه  
**لهلويه :** إحنا أصلنا ما اتعلمناش كمبيوتر  
**طفل :** يعنى لو كنا اتعلمنا الكمبيوتر كنا خرجنا من هنا  
**طفل :** لكن نخرج ازاي دلوقت ده مكان غريب. شايفين شايفين فيه كام باب . باب . اثنتين . ثلاثة . كثير كثير أبواب كثير من غير عدد  
**لهلويه :** لحظة واحدة. أنا شايفه إن كل باب مكتوب عليه عنوان نقرأ المكتوب ونعرف حقيقة اللي ورا الباب  
**طفل :** بسرعة يا لهلويه نقرأ ونعرف  
**لهلويه :** الباب ده مكتوب عليه . باب المعرفة  
**طفل :** وهنا يا لهلويه مكتوب باب المعرفة  
**فوزى :** والباب ده برضه مكتوب باب المعرفة  
**طفل :** باب المعرفة  
**طفل :** باب المعرفة  
**الجميع :** باب المعرفة. باب المعرفة . باب المعرفة  
**طفل :** يعنى أيه، يعنى برضه بعد ما قرينا ماعرفناش حاجة  
**لهلويه :** القراية لوحدها مش كفاية  
**طفل :** أنا مش فاهم. ازاي القراية لوحدها مش كفاية  
**لهلويه :** يعنى لازم نفتح الباب علشان نعرف اللي وراه  
**طفل :** واحنا نقدر نفتح الباب  
**فوزى :** أنا عرفت ازاي افتح الباب، فيه هنا مفاتيح كثير أكيد كل مفتاح مخصوص علشان يفتح باب من أبواب المعرفة

لهلويه : لكن إحنا منعرفش نشغل المفاتيح  
فوزى : أنا ح ضغط على أى مفتاح  
لهلويه : ابعد عن المفاتيح يا فوزى أنت عايز تضيعنا ؟  
فوزى : أضيعكم ليه يا لهلويه  
لهلويه : إحنا منعرفش نشغل المفاتيح وكمان ما نعرفش فيه إيه ورا الأبواب المقفولة دى .  
فوزى : يعنى هيكون وراها إيه ؟  
لهلويه : يمكن يكون وراها حيوان مخيف  
الجميع : حيوان يا ماما  
لهلويه : أو يكون وراها بحر غريق  
الجميع : يا ماما  
لهلويه : أو تكون صحراء نتوه فيها  
الجميع : يا ماما  
ابعد . ابعد . يا فوزى  
ابعد . ابعد . يا فوزى  
فوزى : يعنى خلاص اتحكم علينا نفضل فى المكان الغريب ده طول عمرنا .  
لهلويه : المعرفة موجود وراء كل باب وعشان نعرف لازم نتعلم نشغل المفاتيح دى وإحنا  
ماتعلمناش. يعنى مش ح نعرف. مش ح نعرف  
طفل : والقراية يا لهلويه  
لهلويه : مش كفاية  
طفل : والكتابة  
لهلويه : مش كفاية . مش كفاية القراية والكتابة. لازم نتعلم علم الكمبيوتر.  
حارس : (يدخل) جلالة الملك. الملك الكمبيوتر  
(يدخل الملك الكمبيوتر)  
(كمبيوتر صغير على رأسه تاج الملك)  
الملك : اشكركم. اشكركم  
الوزير : المعذرة يا جلالة الملك أعرف أن الوقت وقت راحتكم

الملك : حصل إيه يا وزير ؟ أمر جديد؟ معلومة جديدة، والمعرفة ؟  
الوزير : المعرفة كلها عندهم يا ملك الكمبيوتر  
الملك : المعرفة لا تنتهى يا وزير. فيه إيه عندك ؟  
الوزير : مجموعة من لصوص المعلومات  
الوزير : اطمئن يا مولاي. معلومات الملكة بخير وفى أمان  
الملك : هم فين اللصوص يا وزير ؟  
الوزير : اللصوص يتقدموا من جلالة الملك  
حارس : (ينادى) اللصوص يتقدموا .. اللصوص يتقدموا انتم مش سامعين.  
الجميع : إحنا مش لصوص  
الملك : انتم طلبه  
فوزى : سامعين يا ولاد الملك أتعرف علينا  
الوزير : ملك الكمبيوتر عنده كل المعلومات  
الملك : قريى منى يا لهلوبة  
لهلوبة : لهلوبة. ده عرف اسمى كمان  
الملك : وقرب معاها يا فوزى  
فوزى : وعرف اسمى أنا كمان  
الملك : واعرِف اسميكم كلكم. قربوا منى فى الحال  
الوزير : اتقدموا بين أيدى جلالة الملك. اتقدموا  
الملك : مرحباً بكم فى المملكة  
الوزير : مملكة الكمبيوتر  
الملك : ودلوقت. عايزين إيه مننا ؟  
لهلوبة : ملك الكمبيوتر بيسألنا عايزين إيه وهو عنده كل المعرفة والمعلومات ؟  
الملك : إلا الاحلام. إلا الأمنيات. كل واحد بيحمل حلمه جواه. أمنيته معاها.  
فوزى : كل واحد حلمه جواه  
طفل : وأمنيته معاها  
فوزى : لكن. أنا عمرى ما سألت نفسى ولا حاولت اعرف أنا إيه حلمى. أمنيتى. أنا بس



بذاكر علشان لما تنتهى السنة الدراسية العب

**طفل :** يعنى حلمك هو اللعب يا فوزى ؟

**فوزى :** لا . أنا نفسى اكبر وابقى ظابط

**الملك :** ضابط . حلمك تكون ظابط . ويتحقق حلمك باللعب ؟

**طفل :** وأنا نفسى أكون دكتور

**الملك :** دكتور . ويتحقق حلمك باللعب

**لهلويه :** وأنا نفسى اكون معلمه

**الملك :** معلمه . وتحققى حلمك باللعب

**لهلويه :** لكن إحنا طلبه فى المدرسة

**الملك :** انتم طلبة فى المدرسة . لكن مش طلبة علم

**لهلويه :** طلبه فى المدرسة . لكن مش طلبة علم . أنا مش فاهمه .

**الجميع :** كلنا مش فاهمين

**الملك :** طالب العلم يحب العلم . طالب العلم يتمنى العلم طالب العلم يبحث عن العلم طالب

العلم عمره ما يحلم باللعب . عمره ما يحلم بانتهاء السنة الدراسية . والعلم عنده

جبل ثقيل وهم يتمنى يخلص منه . طالب العلم . يبحث عن العلم بعد انتهاء الدراسة

**فوزى :** بعد الدراسة يبحث عن العلم . بعد الدراسة نذاكر من تانى .

**الملك :** والمعرفة موجودة فى المكتبات ، ودلوقت عايز اسألكم . انتم ازاي وصلتكم لمملكتنا

**فوزى :** مش عارف

(تعلو أصوات غريبة مزعجة)

**الاطفال :** فى إيه . حصل إيه ؟

جرى إيه . جرى إيه ؟

أنا خايفه . خايفه

كلنا خايفين . خايفين

**الوزير :** قال الكلمة الممنوعة أمام الملك

**لهلويه :** كلمة ممنوعة . كلمة إيه ؟

**فوزى :** وهو يعنى فيه كلمة ممنوعة

الوزير : ممنوعة تنقال فى وجود الملك  
 لهلوية : كلمة إيه يا وزير ؟  
 الوزير : ممنوع اقولها . وممنوع تنقال مفهوم  
 لهلوية : مش عارفة  
 (تعلو الأصوات المزعجة)  
 الاطفال : حصل إيه تانى ؟ جرى إيه ؟  
 الوزير : قالت مرة ثانية الكلمة الممنوعة أمام الملك  
 لهلويه : كلمة ممنوعة . كلمة ممنوعة . كلمة إيه ؟  
 الوزير : ممنوع اقولها . انتم عايزين إيه من عندنا ؟  
 طفل : إحنا عايزين إيه مش عارف  
 (تعلو الأصوات)  
 الاطفال : تانى . كده . أنا خايف قوى  
 هو إيه بس اللي حصل  
 جرى إيه تانى  
 الوزير : قلت ممنوع . ممنوع . الكلمة دى ممنوع تنقال ممنوع  
 طفل : قلنا كلمة إيه ؟  
 الوزير : قلت ممنوع . ممنوع اقولها ممنوع ممنوع تنقال  
 أمام الملك . مفهوم  
 طفل : مفهوم ؟ مفهوم ازاي بس ؟ طبعا مش مفهوم  
 لهلوية : ايوه مش مفهوم . نفهم ازاي وإحنا مش عارفين  
 (تعلو الأصوات)  
 طفل : مش عافين  
 الوزير : ممنوع  
 طفل : مش عارفين  
 الوزير : ممنوع  
 طفل : مش عارفين  
 الوزير : ممنوع  
 طفل : هو إيه اللي ممنوع . إحنا مش عارفين

الوزير : (يصرخ) ممنوع . ممنوع  
 طفل : مش عارفين  
 الوزير : ممنوع  
 طفل : مش عارفين  
 الوزير : ممنوع . ممنوع . ممنوع  
 (الوزير فى حالة هياج) ممنوع . ممنوع  
 الملك : يا وزير . يا وزير . يا وزير (يصرخ) يا وزير  
 الوزير : (يفيق) ممنوع يا مولاي  
 الملك : هو إيه اللي ممنوع ؟  
 الوزير : ممنوعة جملة (مش عارفين)  
 (تعلو الأصوات) (ضحك من الأطفال)  
 الملك : انتم ياللى بتضحكوا ؟ من إيه بتضحكو ؟ وإزاي  
 طفل : مين ؟  
 الملك : أنا أكبر كمبيوتر موجود، والمعرفة عندي من غير حدود  
 طفل : يعنى إنت بتعرف كل حاجة  
 الملك : مافيش حد بيعرف كل حاجة  
 فوزى : يعنى تعرف ترجعنا . أنا عايز ارجع . أنا أتأخرت قوى  
 طفل : وأنا عايز ارجع لبابا  
 طفل : وأنا عايزه أرجع لماما  
 لهلوية : وأنا عايزه ارجع مدرستي  
 طفل : رجعونا . رجعونا  
 طفل : خرجونا من هنا  
 الملك : زى ما دخلتم اخرجوا  
 طفل : إحنا دخلنا هنا غلط  
 الملك : يبقى من مكان ما دخلتم . اخرجوا  
 لهلوية : صحيح، لكن إحنا دخلنا منين فيه هنا أكثر من باب  
 الملك : الخطوة معرفة. وعشان توصل الأول تكون عارف رايع على فين. تعرف أنت دخلت  
 المدرسة ليه .

فوزى : علشان كل أصدقائى فى المدرسة  
طفل : أنا دخلت المدرسة علشان بابا وماما قدموا ليه فى المدرسة  
طفل : أنا بقى دخلت المدرسة علشان . علشان . مش عارف  
لهلوية : أنا دخلت المدرسة علشان أنجح  
الملك : غلط . غلط . كلكم للأسف غلط  
الجميع : غلط . غلط  
الوزير : دلوقت تعرفوا الصبح من ملك الكمبيوتر  
الملك : المدرسة بيت المعرفة المدرسة صندوق المعلومات، واللى يدخل المدرسة. يدخل علشان  
المعرفة علشان المعلومات  
طفل : هو كل حاجة عندك علشان المعرفة والمعلومات  
الوزير : أتكلم بأدب مع جلالة الملك  
طفل : ملك . هو فى الملك . ده صغير قوى . وتقريبا كده.. قدنا وسنه من سننا  
لهلويه : معاك حق . ده عمره كده من عمرنا  
الملك : عندنا هنا فى مملكة الكمبيوتر. اللى يلبس تاج الملك ويكون هو الملك أكثرنا معرفة.  
يعنى مش مهم عمرك قد إيه. المهم اتعلمت قد إيه  
فوزى : سامعين يا أولاد . سامعه يا لهلوية  
لهلوية : ايوه . سامعه يا فوزى نفس كلام المستر كمبيو  
طفل : دلوقت عرفت هو منين بيقول الكلام ده  
لهلويه : قصدك من الكمبيوتر  
طفل : يعنى أنا لو اتعلمت كمبيوتر أقول كلام حلو ذى المستر كمبيو  
فوزى : نتعلم إيه دلوقت. المهم نخرج من هنا  
لهلويه : نخرج ازاي وفى هنا أكثر من باب وباب  
طفل : وكل الأبواب مقفولة يا لهلوية  
لهلوية : يا ترى دخلنا من أى باب  
طفل : أنا بقول دخلنا من الباب ده  
طفل : لا . من الباب ده  
الجميع : من الباب ده .. من الباب ده من الباب ده  
(جميع الأطفال يسقطون على الأرض)

طفل : تعبنا . تعبنا  
طفل : احترنا . احترنا  
الوزير : تعبوا يا جلالة الملك  
الملك : دى فرصتهم يا وزير . فرصتهم علشان يعرفوا يبحثوا ويبحثوا يمكن يعرفوا .  
فوزى : أنا ح شغل المفاتيح .  
لهلويه : لا يا فوزى . كفاية اللي جرائنا لما شغلت المفاتيح من غير ما تعرف .  
طفل : ما فيش قدامنا طريق ثانى يا لهلويه .  
طفل : نجرب يمكن نعرف .  
فوزى : أنا ح شغل المفاتيح . ح شغل المفاتيح .  
(يضغط على أحد المفاتيح)  
(أضواء سريعة مختلفة . أصوات قوية)  
الجميع : فيه إيه .. فيه إيه ؟  
حصل إيه  
أنا خايف . خايف  
أنا خايفه . خايفه  
فى باب هناك انفتح  
باب معرفة انفتح  
نخرج منه بسرعة . نخرج منه بسرعة  
(الاطفال يخرجون مسرعين)  
(الملك والوزير يضحكان)  
الوزير : دخلوا من الباب يا مولاي  
الملك : فاكرين انهم خرجوا من الباب  
الوزير : هو ده حال اللي مش عارف . لا يبقى عارف أن كان داخل ولا خارج  
(الملك والوزير يضحكان)

## اللوحة الثالثة

(المنظر عبارة عن تشكيل فرعوني . عصر العلم الأول .  
مجموعة من التلاميذ فى زى فرعوني . كل منهم يحمل كيساً  
وتختلف الأحجام . داخل الأكياس حجارة يستخدمها  
التلاميذ فى العد والحساب .  
(يتم استعراض بداية العد والحساب)  
الاستعراض الفرعوني  
(مجموعة الأطفال فى جانب من المسرح)  
فوزى : لهلويه . لهلويه إحنا فين يا لهلويه  
طفل : مكان غريب وعجيب . زى اللي بنسمع عنه فى الحكايات والحواديت  
طفل : أنا مش عارف احنا ازاي وصلنا هنا  
طفل : اقولك .. احنا لما خرجنا من الباب علشان نرجع خرجنا من الباب القلط  
لهلويه : لا . احنا دخلنا دخلنا من الباب  
طفل : فهمينا يا لهلويه . احنا دخلنا ولا خرجنا  
لهلويه : دلوقت نعرف كل حاجة  
طفل : دلوقت أمتى . أنا دلوقت خايف . خايف قوى  
فوزى : احنا كلنا خايفين خايفين ومش عارفين احنا فين  
فرعوني ١ : ادب . نظام . احترام مش عايز صوت فى الحصّة  
فرعوني ٢ : عايزين نبقي على راحتنا يا مينا المعلم مش موجود  
فرعوني ١ : غلط يا منقرع . احنا لازم نحترم المعلم فى غيابه وفى وجوده وكمان لازم  
نحترم حصه المعلم  
فرعوني ٣ : لكن هو صحيح المعلم ح يفرجنا النهاردة على احدث جهاز للعد والحساب  
فرعوني ٢ : أيوه . عايزين نتعلم نعد على الجهاز الجديد علشان أنا تعبت قوى وأنا بأعد  
واحسب بالحجارة

**فرعونى ٣ :** أنا قدرت امبارح اعمل الواجب واعد من الحجارة فى الكيس لغاية ١٥٠ .

**فرعونى ١ :** وانا عملت الواجب وعديت ٢٥٠ .

**فرعونى ٢ :** وانا عملت الواجب وعديت لغاية ٢٠٠ .

**فرعونى ٣ :** بس الواجب اللي قال لنا عليه المعلم فى حصه امبارح كان العد لغاية ٥٠٠ .

**فرعونى ١ :** ٥٠٠ . ٥٠٠ كثير قوى يا خفرع والحجارة تكون كثير وتملى اكثر من كيس وكيس .

**فرعونى ٢ :** الأمل دلوقت فى العلم الحديث .

**فرعونى ٣ :** معاك حق يا مينا الامل فى الجهاز الجديد . يوفر لنا الوقت ويقلل كمان المجهود المعلم : معاك حق يا خفرع .

(يدخل المعلم . هو طفل فى عمر الاختراع) .

يحمل فى يده . الجهاز الجديد للعد والحساب . وهو اله (الأباكوس) وهذه الاله تم اختراعها قديما لتبسيط عملية العد والحساب وهى عبارة عن حاملين من الخشب بينهم قطع خشبيه صغيره على هيئة مجموعات كل مجموعة تمثل وحدة . وحدة الاحاد . وحدة العشرات وحدة المئات .

**فرعونى ١ :** المعلم وصل . المعلم وصل

**فرعونى ٢ :** حصه العلم . قيام للمعلم

(جميع طلبة العلم يرحبون بالمعلم)

**فوزى :** شايقة يا لهلويه معلم الحصه . صغير قوى

**لهلويه :** تقريبا كده من عمرنا وسنه من سننا

**فوزى :** صدق كلام المستر كمبيو

**طفل :** كلام إيه يا فوزى ؟

**فوزى :** لما قلنا مش مهم عمرك قد ايه المهم اتعلمت قد ايه

**لهلويه :** الواضح كده يا أولاد أنه مش كلام المستر كمبيو ومش تعاليمه دى تعاليمنا من زمان

**فوزى :** تعاليمنا من زمان

**لهلويه :** وماتعلمنهاش . متعلمنهاش

المعلم : ودلوقت أشرحلكم الآله الجديدة للعد والحساب الآله اللى هتعمل ثورة فى عالم الرياضيات .

فرعونى : اله غريبه قوى

المعلم : الآله الجديدة اسمه اله (الاباكوس)

فرعونى : اشرح لنا يا معلم

فرعونى : فهمنا يا معلم

فرعونى : عرفنا يا معلم ازاي نجحت اله الاباكوس والعلم الحديث فى حل مشكلة الحجارة والعد والحساب

المعلم : إله الاباكوس ذى ما انتم شافيين مقسم لأحاد وعشرات ومئات . وكل جزء من الاحاد بواحد وكل جزء من العشرات بعشرة وكل جزء من المئات .

فرعونى : ميه يا معلم

المعلم : يعنى جزئين

فرعونى : ثلاثه يا معلم

المعلم : خمس أجزاء من المئات

فرعونى : ٥٠٠ يا معلم

(( تصفيق حاد ))

المعلم : عصر العد والحساب على الحجارة انتهى ودلوقت بدأ عصر العد والحساب على الاباكوس

(( تصفيق ))

المعلم : انهارده اللى ما يعرفش بعد ويحسب على الاباكوس يبقى على طول هو الامى

فرعونى : انهارده اللى ما يعرفش الاباكوس هو الامى

المعلم : تمام يا منقرع . هو ده عصر الاباكوس

فرعونى : يحيا عصر الاباكوس

الجميع : يحيا عصر الاباكوس

فرعونى : ودلوقت يا معلم نقدر نعد ونحسب على اله العصر

المعلم : الاول لازم نتعلم ازاي نستخدم الآله الجديدة



**فرعوني :** لسه ح نتعلم من جديد  
**المعلم :** ايوه ح نتعلم العلم الحديث. نتعلم نستخدم الاباكوس نتعلم الطرق الحديثة المتقدمة.  
علشان نتقدم ونرتقى مش عايزين نتخلف عن ركب الحضارة يا ولاد  
**فوزي :** احنا مستعدين للتعلم يا معلم  
**المعلم :** ودلوقت نبدء أول حصة لتعلم العد والحساب على جهاز العصر الة الأباكوس  
**فرعوني :** يحيا عصر الأباكوس  
**الجميع :** يحيا عصر الاباكس  
(استعراض جماعى اثناء التعليم على الأباكوس)  
(مجموعة الأطفال الغرباء فى نوبة ضحك جماعى)  
(يتوقف المعلم عن الشرح)  
**المعلم :** مين اللي ضحك فى حصة العلم ؟  
**فوزي :** المعلم سمعنا  
**لهلوية :** يعنى كان لازم نضحك  
**طفل :** احنا ضحكنا على الالة الجديد وقال ايه بيقولوا عليها العلم الحديث  
**طفل :** علم حديث . حديث ايه ده علم متأخر قوى . طب بقى يعملوا ايه لو شافوا الكمبيوتر  
**طفل :** الكمبيوتر . وهم يعرفوا حاجة عن الكمبيوتر  
**فوزي :** (ضحك من الاطفال)  
**المعلم :** . يقترب منهم) أنتم مين ؟ .  
**طفل :** أحنا .. أحنا  
**المعلم :** ايوه انتم . ومنين جايين  
**طفل :** جايين من القرن الواحد والعشرين  
**المعلم :** القرن الواحد والعشرين  
**طفل :** ايوه . عصر الكمبيوتر  
**المعلم :** الكمبيوتر . الكمبيوتر ايه ؟  
**طفل :** الكمبيوتر .  
(جزء من أغنية الكمبيوتر)

المعلم : (بغضب) كفاية، جاين تضيعوا وقت حصة العلم بالغنا والتهرير

طفل : احنا . احنا

المعلم : انتم ايه

طفل : إحنا أسفين

المعلم : عايز اعرف انتم مين

لهلويه : أنا لهلويه وده فوزى والباقي اصدقائي

المعلم : شكلكم غريب. لبسكم غريب . كلامكم غريب كل حاجة فيكم غريبة وعجيبة . انتم

منين جاين

طفل : ما قلنا القرن الواحد والعشرين

المعلم : مستحيل

طفل : هي دى الحقيقة . احنا من عصر الكمبيوتر

المعلم : كمبيوتر ايه ؟

طفل : كمبيوتر

(محاولين الغناء)

المعلم : من غير غنا وتهرير أنا عرفت أنتم مين

الجميع : الحمد لله

المعلم : انتم جواسيس

الجميع : جواسيس

المعلم : يا حراس اقبضوا على الجواسيس

الجميع : جواسيس

المعلم : جواسيس لسرقة افكارنا

الجميع : جواسيس

المعلم : جواسيس لسرقة علمنا

الجميع : جواسيس

المعلم : جواسيس لسرقة اختراعنا

الجميع : جواسيس

المعلم : جواسيس لسرقة الاباتكوس  
الجميع : ابا . ابا . ابا . ايه  
المعلم : الاباتكوس  
(الاطفال الفراعنة وجزء من أغنية الاباتكوس)  
فوزى : ضعنا خلاص يا ولاد  
طفل : ضعنا خلاص يا فوزى  
لهلويه : ضعنا ازاي ؟ . احنا مش جواسيس  
طفل : فاكرين إننا جواسيس جواسيس لسرقة ألتهم الحديثة  
لهلويه : الاباتكوس . مش معقول . مش معقول الاباتكوس الاباتكوس واحنا معانا الكمبيوتر  
طفل : معاكى حق يا لهلويه . احنا آلاتنا أحدث من آلاتهم  
لهلويه : وعلمنا سابق علمهم .  
طفل : الاباتكوس فى عصرنا اله قديمة ومتأخرة  
لهلويه : عصرنا عصر الكمبيوتر  
المعلم : يا حراس اسحبوا الجواسيس على السجن  
طفل : سجن ثانى . احنا كل ما نوصل مكان يدخلونا السجن  
لهلويه : ارجوك يا معلم فى الاول اسمع مننا  
المعلم : عايزة تقولى ايه ؟  
لهلويه : احنا مش جواسيس  
المعلم : مش جواسيس . طب ليه نازلين ارضنا  
فرعون : يمكن يا معلم عايزين يتعلموا علمنا  
المعلم : يتعلموا العلم الحديث  
فرعون : ايوه يا معلم . اله الاباتكوس .  
المعلم : العلم للجميع . العلم زى الهو او الميه . من حق كل الناس . خلاص أنا وافقت  
طفل : وافقت على أيه ؟  
المعلم : تتعلموا علمنا تتعلموا اله الاباتكوس  
طفل : اله الاباتكوس . اله الاباتكوس كفاية تأخر وجهل

المعلم : تأخر وجهل ؟  
طفل : انتم متأخرين قوى  
المعلم : متأخرين ؟  
طفل : لسه بتحسبوا على الاله الاباكوس  
المعلم : اله الاباكوس احدث اله للعد والحساب  
طفل : دى الاباكوس احدث اله للعد والحساب  
المعلم : انتم نازلين ارضنا علشان تهينونا يا حراس  
لهلوية : بلاش الحراس . احنا أسفين.  
فوزى : اله الاباكوس اله متخلفة وانتم كمان متخلفين.  
المعلم : لا . انتم مصريين تهينوا . يا حراس.  
لهلوية : بلاش الحراس . احنا اسفين وبعدين يا فوزى ليه عايز تزعل مننا المعلم.  
فوزى : انا عايز افهمه وهو اللي مش فاهم.  
المعلم : انا مش فاهم . يا (مقاطعه).  
لهلوية : ارجوك . من قبل ما تنادى على الحراس صديقى عايز يفهمك.  
المعلم : برضه يفهمنى.  
لهلوية : قصدى يقولك ويعرفك بالآتنا الحديثة.  
المعلم : آلاتكم الحديثة.  
لهلويه : الكمبيوتر .  
المعلم : ال . ال . الكمبيوتر.  
لهلويه : الكمبيوتر هو تلك الوحدة التى تقوم بمعالجة البيانات الاولى للحصول على المعلومات.  
المعلم : يعنى علمكم سابق على علمنا.  
فرعونى : ما تصدقش يا معلم . دول أصلهم كذايين.  
فرعونى : أيوه كذايين . بيكذبوا علشان يهربوا.  
لهلوية : إحنا مش كذايين.  
فرعونى : كذايين . آلتنا أحدث الآلات فى العلم الحديث.

فوزى : إحنا صادقين والتكم دى متأخرة.  
فرعونى : أنتم كدابين . هو فيه اله اسمها ال ال.  
فوزى : الكمبيوتر يا متخلف.  
فرعونى : ايوه . هو آله اسمها الكمبيوتر.  
لهلويه : التنا الحديثة.  
طفل : الكمبيوتر .  
فرعونى : الميه تكذب الغطاس احنا عايزين الدليل.  
طفل : الدليل.  
فرعونى : ايوه . دليل على صدق كلامكم.  
فرعونى : عايزين نشوف ألتكم.  
فرعونى : عايزين نتفرج على الكمبيوتر.  
المعلم : ألتنا الحديثة الاباكس قدام عينيكم . فين ألتكم ؟ فين علمكم الحديث ؟ فين الكمبيوتر ؟  
جميع الاطفال : فين الكمبيوتر ؟  
المعلم : قدموا اختراعكم .  
الجميع : اختراعنا ؟  
المعلم : قدموا علمكم  
الجميع : علمنا ؟  
المعلم : قدموا الكمبيوتر  
الجميع : الكمبيوتر ؟  
المعلم : لو قدمتم علمكم . لو قدمتم علمكم نصفح عنكم وتتعلم منكم  
الجميع : تصفح عننا ..  
وتتعلم مننا ؟  
المعلم : لو عجزتم عن اثبات كلامكم. واتضح انكم كدابين ح نعدمكم ونطير دماغكم فى الحال  
الجميع : يعدمنا . يعدمنا

يطير دماغتنا

ضعنا خلاص . ضعنا خلاص

المعلم : واقفين ساكتين. واحنا ليكم منتظرين فين علمكم ؟

فوزى : علمنا ؟ .. علمنا علمكم

المعلم : فين اختراعكم الجديد ؟

طفل : هو فين ؟

المعلم : فين الكمبيوتر ؟

لهلويه : يا ريتنا كنا اتعلمنا الكمبيوتر

فرعوني : مش قلنا لحضرتك يا معلم انهم كدايين

المعلم : كان لازم ياخذوا الفرص الأخيرة. لكن اتضح فعلا انهم كدايين. كدايين

وجواسيس .

الجميع : ضعنا خلاص .

المعلم : جواسيس لسرقة أفكارنا وعلمنا علشان شعوبهم تتقدم وشعوبنا تتأخر . أقبضوا

على الجواسيس

فوزى : يا ولاد . يا ولاد . العمل ايه دلوقت

طفل : الحل الوحيد اننا نهرب

لهلوية : نهرب قبل ما يقبضوا علينا

طفل : ويعدمونا ويطيروا رقابنا

فوزى : بسرعة . بسرعة . اهربوا اهربوا .

المعلم : اقبضوا على الجواسيس وحذارى يهربوا منكم

(مطارده بين الحرس والاطفال)

لهلويه : (تنادى) يا ملك الكمبيوتر

الجميع : يا ملك الكمبيوتر

لهلوية : انقذنا يا ملك الكمبيوتر

المعلم : اقبضوا عليهم يا حراس

لهلوية : يا ملك الكمبيوتر

الجميع : يا ملك الكمبيوتر  
المعلم : ويكون مين ملك الكمبيوتر ده ؟  
فرعونى : اكيد ملك مملكة بعيدة عننا يا معلم  
لهلوية : انقذنا يا كمبيو  
الجميع : انقذنا يا كمبيو . انقذنا يا كمبيو . انقذنا يا كمبيو  
(يدخل ملك الكمبيوتر فى صورة عظيمة . يتم الاستعداد لها على المسرح)  
(الجميع على المسرح خائفين لحظة دخول الكمبيوتر)  
ملك الكمبيوتر : (يجرى الى الة الاباتكوس) اباتكوس . اباتكوس  
لهلوية : الملك الكمبيوتر عرف الاباتكوس  
طفل : الملك عنده كل المعلومات  
ملك الكمبيوتر : يعتبر عداد اباتكوس أول الة يدوية استخدمها الانسان فى أجزاء العمليات  
الحسابية وقد تم اختراعها منذ حوالى ثلاثة الاف سنة وهناك انواع مختلفة من هذه  
الاله من حيث طريقة تركيبها واستعمالها وكلها تؤدي الى خدمة ذهن الانسان .  
فرعونى : م . م . م . مين ده ؟  
فرعونى : ق . ق . قول ايه ده ؟  
فرعونى : شكله غريب  
فرعونى : حركاته عجيبة  
فرعونى : هو . هو . ي . ي . ايه . ايه ؟  
فرعونى : حصل ايه ؟  
فرعونى : جرى ايه ؟  
فرعونى : هو ايه . انس ولا جن ؟  
فرعونى : جن . جن  
ج الفراعة : جن . جن  
فرعون : اعوذ بالله . جن يا معلم . جن يا معلم  
المعلم : اعوذ بالله جن فى ارضنا ؟  
ج الفراعة : جن فى ارضنا

المعلم : اصرفوا الجن . اصرفوا الجن من ارضنا

اصرفوا الجن . اصرفوا الجن

فرعونى : نصرف الجن

ج الفراعة : نصرف الجن

(استعراض راقص لبعض الطقوس القديمة لطرد العفاريت)

(استعراض صرف الجن)

فرعون : الجن واقف مكانه مانصرفش

فرعون : الجن ماتحركش

فرعون : ازاي مانصرفش . ليه ما تحركش

فرعونى : الجن ح يسحرنا

فرعونى : الجن ح يجننا

فرعونى : اعوذ بالله

الجميع : اعوذ بالله

فوزى : هم مالهم . جرالهم ايه ؟

لهلويه : اصلهم خائفين

فوزى : خائفين من ايه ؟

لهلويه : فاكرين الكمبيوتر عفريت

فوزى : الكمبيوتر عفريت (يضحك)

(الجميع يضحكون)

لهلويه : يا معلم . يا معلم

المعلم : ابعدى فى سلام اخرجوا من ارضنا وعليكم الامان

لهلويه : انتم من ايه بس خائفين ؟

المعلم : خائفين من العفاريت

لهلويه : هي فين العفاريت ؟

المعلم : خائفين من الجان

لهلويه : وهو فين الجان



المعلم : اللى واقف . قدامكم هناك  
لهلويه : لكن اللى واقف هناك لا هو عفريت ولا جان  
المعلم : لا هو عفريت ولا جان ؟  
لهلويه : انت مش طلبت تشوف آلتنا الحديثة  
المعلم : الكمبيوتر  
لهلويه : اللى واقف هناك . الكمبيوتر يا معلم  
المعلم : مستحيل .  
لهلويه : صدقنا يا معلم . هى دى آلتنا الحديثة  
فرعونى : ما تصدقش يا معلم . ده جان . عفريت  
المعلم : اعوذ بالله  
ج الفراعنة : جان . عفريت . اعوذ بالله  
لهلويه : صدقونى . لا جان ولا عفريت . ده الكمبيوتر  
فرعونى : كدابين يا معلم  
لهلويه : والله احنا صادقين  
فرعون : عفريت  
لهلويه : الكمبيوتر  
المعلم : اصدق مين واكذب مين  
فرعون : تصدقنا احنا يا معلم  
لهلويه : انتم مش عارفين  
المعلم : يعنى انتم اللى عارفين  
لهلويه : ايوه يا معلم . ده علمنا . اختراعنا . واحنا اللى عارفين  
المعلم : محتمل تكونوا صادقين ومش كدابين  
فرعونى : صدقتهم يا معلم  
المعلم : أنا لسه ماصدقتش كلامهم  
لهلويه : يعنى مكدينا ؟  
المعلم : ومش مكديكم

لهلويه : يعنى ايه ؟ .. لا مصدق ولا مكذب ؟  
المعلم : عقلى ما بين الصدق والكذب . وامركم بين ايديكم تقدروا انى اصدق وتقدروا انى  
الكذب  
لهلويه : انا مش فاهم  
المعلم : العلم ده علمكم ؟  
لهلويه : ايوه علمنا  
المعلم : والاله دى من صنعكم ؟  
لهلويه : ايوه من صنع عصرنا .  
المعلم : جميل . جميل . دلوقت تقدروا . تفرجونا . ازاي آلتكم بتشتغل لو عرفتم تكونوا  
صادقين. لو ما عرفتش تكونوا كدابين وحكى ينفذ فيكم فى الحال .  
الجميع : الإعدام ؟!  
المعلم : تطير الرقاب  
لهلويه : انا خايقة قوى ومرعوبه  
طفل : وانا مرعوب يا لهلويه  
فوزى : والعمل ايه دلوقت . احنا ما اتعلمناش الكمبيوتر  
لهلويه : والسبب انت يا فوزى  
فوزى : انا السبب ؟  
لهلويه : لعبت فى جهاز الكمبيوتر من قبل ما نتعلم  
فوزى : هو ده وقته يا لهلويه باقولك ح يطير رقابينا  
طفل : نعمل ايه ؟ .. ما اتعلمناش  
الجميع : نعمل ايه ؟ .. ما اتعلمناش  
(يتجمع الأطفال حول الكمبيوتر)  
طفل : كمبيو . كمبيو . رد علينا يا كمبيو  
طفل : كمبيو . انقذنا يا كمبيو . حياتنا فى خطر يا كمبيو  
طفل : كمبيو . كلمنا يا كمبيو . مرة واحدة يا كمبيو  
طفل : اتكلم يا كمبيو . ارجوك انطق . قولنا . نضغط على أى مفتاح؟ المفتاح ده . المفتاح

ده . ولا ده . ولا ده . كمبيو انطق يا كمبيو

طفل : كمبيو . احنا أصدقاءك محتاجين مساعدتك محتاجين علمك

طفل : كمبيو . احنا من غير علمك نضيع

طفل : من غير علمك ننتهى

طفل : كمبيو . اعطف علينا وساعدنا

طفل : كمبيو نبوس ايدك . نبوس رجلك

الجميع : ارحمنا يا كمبيو

طفل : ساعدنا يا كمبيو

طفل : علمنا يا كمبيو . علمنا يا كمبيو . علمنا يا كمبيو

لهلويه : والعمل ايه دلوقت . يعنى خلاص مافيش فايده

فوزى : لا . مفيش فايده

لهلويه : ح تعمل ايه يا فوزى ؟

فوزى : ح شغل الكمبيوتر

لهلويه : لا . أرجوك كفاية يا فوزى

فوزى : هو ده الحل الوحيد

الجميع : بلاش يا فوزى . ارجع يا فوزى

فوزى : باقول لكم هو ده الحل الوحيد

(يجلس امام الكمبيوتر)

فوزى : انا ح شغل الكمبيوتر

(يضغط على بعض المفاتيح . تخرج اضاءه و اصوات غريبة .. يتغير المسرح)

فوزى : اشتغل الكمبيوتر . اشغل الكمبيوتر

(الفراعه خائفين)

فرعون : اعوذ بالله . اعوذ بالله

الجميع : اعوذ بالله

المعلم : أعوذ بالله

الجميع : أعوذ بالله

المعلم : احرقوا العفاريت . احرقوا العفاريت

فرعون : بأمر المعلم اشعلوا النار

فرعون : بأمر المعلم احرقوا العفاريت

المعلم : احرقوا العفاريت . احرقهم . احرقهم

(يشعلون النيران)

(النيران تملأ المكان - لا نرى سوى النيران)

(نسمع صرخات بكاء)

الاطفال : النار . النار .

النار . النار

## اللوحة الأخيرة

( الفصل الدراسي في اللوحة الاولى )

( المستر كمبيو . يجلس امام الكمبيوتر )

**كمبيو :** مبروك يا ولاد . نجحت في اصلاح العطل الموجود بالكمبيوتر .

**لهلويه :** يعنى دلوقت نبدأ الحصّة

**فوزى :** نقدر نتعلم الكمبيوتر

**كمبيو :** الأهم نكون عايزين نتعلم

**الجميع :** عايزين نتعلم

**الجميع :** عايزين نتعلم

**فوزى :** وأول درس فى اول حصّة

**كمبيو :** مش مهم عمرك قد ايه . الأهم اتعلمت قد ايه

**فوزى :** يعنى انا ممكن اكون دكتور ؟

**كمبيو :** العلم هو الأهم

**فوزى :** وانا ممكن اكون مهندس ؟

**كمبيو :** العلم هو الأهم

**لهلويه :** وانا ممكن اكون معلمه

**كمبيو :** العلم هو الأهم . وممكن ممكن تحقق كل الاحلام بالعلم . المشوار الطويل ييقصر .

بالعلم والبعيد بيقترب بالعلم .

**الجميع :** المشوار الطويل ييقصر

كمبيرو : بالعلم

الجميع : البعيد . يقرب

كمبيرو : بالعلم

الجميع : الاحلام تتحقق

الجميع : بالعلم الاحلام تتحقق . بالعلم الاحلام تتحقق

( أغنية واستعراض )

( بالعلم الأحلام تتحقق )

ليه يا أسد





ما يحدث حولنا سرقتنا  
فلم نعد أطفالاً ولم نصبح كباراً  
لم تبق البراءة ولم تأت التجاعيد  
لم يبق اللهو ولم يأت المشيب  
من نكون... ماذا نكون؟



## الشخصيات

### \* أسرة الإنسان

- ١- تامر
- ٢- حسن (بائع الجرائد)
- ٣- الرجل
- ٤- مجموعة من الأطفال

### \* أسرة الحيوان

- ١- الأسد ٢- ميمونة ٣- الديب
- ٤- الحمامة ٥- الدودة ٦- الضفدع
- ٦- مجموعة من الحيوانات

### \* أسرة النبات

- ١- الوردة
- ٢- الشوك
- ٣- الشجرة

### \* أسرة النور

- ١- القمر
- ٢- الشمس



## مدخل ... احتفال

(الحيوانات تجتمع فى سبوع ابن القردة ميمونة)  
(يقدم السبوع فى شكله التقليدى)  
(الأم ميمونة يظهر عليها الإجهاد ... القرد المولود فى الغربال)  
(أكياس السبوع .. الداية... رش الملح)  
(زغاريد.. رقص .. غناء)  
(كل هذا من خلال استعراض السبوع)  
(تبكى ميمونة وتحتضن ابنها .. تجرى تختبأ فى العشة)

الجميع : حصل ايه؟

مالها ميمونة؟

جرى إيه؟

حصل إيه ؟ ميمونة ياميمونة ياميمونة

الديب : هى ميمونة جرى لها حاجة؟

تف من بقلك

بعد الشر

الديب : الحمد لله أيوة كده طمنونى على ميمونة وعلى ابنها وخصوصا ابنها

حيوان : وليه خصوصا ابنها

الديب : أنا علشان أنا محضر هدية لكن إيه أجمل هدية

حيوان : ومن امتى بتعرف تهادى ياديب

حيوان : وتفهم فى الذوق والواجبات

الديب : وايه يمنع الديب انه يفهم.. ناقص حته ولا ناقص حته

حيوان : لا ناقص ولا زايد، أنت عايز ايه دلوقت

الديب : عايز اشوف ميمونه وابنها، أنا سمعت أنه جاى قرد زى القل

حيوان : قمر ياروحى عليه، تشوفه مش ممكن تقول قرد.. تقول غزال

حيوان : عيون خضرا وشعر اصفر  
حيوان : ولا ضحكته ياعينى على ضحكته تشرح القلب  
الديب : طيب امال ايه اللى حصل.. المفروض أننا نكون فرحانيين ومزقططين  
حيوان : فرحانيين ليه.. ومزقططين على ايه  
حيوان : دى ميمونة قاعدة جوه ودمعتها نازلة تسح تسح على خدها  
الديب : تسح تسح طيب وميمونة بتبكي ليه  
حيوان : ميمونة خايفة ياديب  
الديب : وميمونة خايفة من ايه  
حيوان : خايفة على ابنها ياديب  
الديب : وهو جرى ايه لابنها  
حيوان : أنت نسيت اللى حصل السنة اللى فاتت  
الديب : حصل خير  
حيوان : (يغضب) خير ازاي، بسرعة نسيت اللى حصل ، دى الغابة كلها فاكرة  
الديب : وحيجرى ايه لو اللى حصل السنة اللى فاتت حصل السنة دي برضه ده يبقى من  
حظ ميمونة وسعدها هو فى حيوان يكره  
حيوان : طبعا .. العاقل هو اللى يكره  
الديب : قول بقى المجنون اللى يكره السعد والفرح لولاده  
حيوان : سعد وفرح! سعد وفرح يبعد الابن عن أمه  
الديب : ويعنى يعيش مع أمه يعمل ايه فى الغابة دى.. يوم ياكل وعشره لأ.. لكن هناك  
فى السيرك الكل فى خدمته  
حيوان : ياديب أنت عمرك ما تقول كلمة حق واحدة  
الديب : أنا بقول الحقيقة، أنا عايز مصلحتكم .. مصلحة الغابة  
حيوان : مصلحتنا هنا ، إننا نعيش مع بعض .. نعيش على حريتنا  
الديب : والسيرك.. وحديقة الحيوان .. والافلام والمسلسلات والبطولات .. المجد والشهرة  
والنجومية  
حيوان : السيرك والحديقة والافلام سجن.. سجن لحبس حريتنا

الديب : حيوانات هم.. غاوية فقر  
حيوان : ياديب.. ياديب دي ميمونة كانت ح تموت السنة اللي فاتت لم خطفم منها ابنها  
الديب : ميمونة دي مجنونة.. تروح تتفرج على ابنها فى السيرك كل ليلة وسط الاضواء  
والهتافات ابنها بقى اشهر نجم في البلد  
حيوان : يا عيني عليكى ياميمونة ليل نهار قاعدة تبكى وانهاردة زاد عليها الهم بخوفها علي  
ابنها التانى  
الديب : صحيح اللي قال عليكم حيوانات من غير عقل صحيح (يظهر ثلاث من مدربين  
السيرك)  
حيوان : شايفين مين اللي هناك؟  
حيوان : قصدك مين  
حيوان : شوف كويس.. اللي واقفين هناك  
حيوان : ايوه..ايوه.. لكن هم مين دول  
حيوان : بسرعة كده نسيتهم  
حيوان : استنى .. أنا عرفتهم.. مش هم اللي (مقاطعة)  
حيوان : هم ، هم اللي خطفوا ابن ميمونة السنة اللي فاتت  
حيوان : وهم النهارده جاين ليه  
حيوان : طبعا علشان ميمونة  
حيوان : علشان يطمنوا على صحتها؟  
حيوان : صحتها ده ايه.. جاين انهاردة علشان ابنها  
حيوان : قصدك يعني يخطفوا ابنها التانى  
حيوان : امال يعني يقدموا الهدايا ونقوط السبوع  
حيوان : لا ، حرام ، ميمونة، دي ميمونة تموت فيها المرة دي  
حيوان : واحنا نقعد نتفرج لغاية ما تحصل حاجة وحشة لميمونة  
حيوان : واحنا نقدر نعمل ايه  
حيوان : حرام حرام، خلاص يعنى الدنيا لا عاد فيها امان ولا سلام  
حيوان : احنا لازم نتصرف بسرعة ونلحق نبليغ ميمونة

حيوان : ايوه.. ميمونة لازم تهرب هي وابنها  
حيوان : لكن دي لسه والده وتعبانه  
حيوان : مافيش وقت.. تعالوا معايا بسرعة نبليغ ميمونة  
الجميع : بسرعة ، بسرعة، ياميمونة، ياميمونة يا ميمونة  
(خروج جميع الحيوانات)  
(مدرب السيرك فى الوسط)  
الاول : انتم متأكدين ان هو ده المكان  
الثاني : أكيد هو المكان ، هي دي الخريطة اللي رسمها الحيوان  
الثالث : أنا مش مرتاح للحيوان ده  
الاول : ليه  
الثالث : حيوان غدار  
الثاني : وهو يقدر يغدر بينا  
الثالث : غدر بأهله وخان اصدقائه  
الاول : لكن ما يقدرش يغدر بينا لأنه عارف أننا أقوى منه  
الثاني : وكمان ده حيوان طماع، والطماع يعمل أى حاجة علشان يرضى طمعه وجشعه  
الاول : ويبعدين راح فين الحيوان ده، هو مش قال إنه ح ينتظرنا  
الديب : (يدخل) والديب عمره ما يخلف ميعاده ودايما صادق فى كلامه  
الاول : كنت فين  
الثاني : وايه اللي أخرك عن ميعادك  
الديب : كنت لازم اطمئن أن مافيش أى حيوان بيراقبني والاحيوان يلمحنى ويعرف أنى  
بساعدكم ويروح يبلغ الاسد  
الاول : طول عمرك جبان ويتخاف من الأسد  
الديب : لكل مكان الاسد بتاعة، والكل بيخاف منه  
الاول : طيب كفاية فلسفة، فين المطلوب  
الديب : وفين حقى الاول يانوق  
الثاني : حقك محفوظ احنا من امتي أكلنا عليك حقوق إحنا مشترين منك أكثر من خمسين



حيوان قبل كده

الديب : المطلوب رايح فين المدة دي

الثالث : مش شغلك يروح مكان ما يروح

الديب : مش شغلى ازاي أنا لازم اعرف سيرك ولا حديقة ولاح يشتغل فى السيمما كل

شئء وليه سعر

الثانى : المطلوب محتاجينه لبطولة مسرحية

الديب : مسرحية ايه

الثانى : مسرحية (ليه ياأسد)

الديب : يبقى السعر يزيد المرة دي ألفين جنيه

الاول : ليه ، احنا مشترين اخوه السنة اللي فاتت بألف جنيه

الديب : السنة اللي فاتت كان سيرك لكن المرة دي تختلف ده مسرحية يامحترم ويمكن عدة

بطولات كمان

الاول : احنا موافقين بس خلصنا، المطلوب فين

الديب : المطلوب في العشة اللي قدامك دي

الثانى : ما تقول كده من الصبح امسك المطلوب بتاعك

الديب : تشكر يا ذوق .ياخذ الفلوس ويخرج)

الاول : بهدوء، ندخل نخطف ابن ميمونة ونخرج بدون أى ازعاج وافتكروا دايمًا إننا في

الغابة

(يستعد لدخول العشة ، حركات ترقب )

(تخرج ميمونة. تحتضن ابنها.. تبعد عن المدرين)

(جميع الحيوانات يلتفون في مهمات غاضبة)

ميمونة : (تبكى) لا ، مستحيل، حرام عليكم، ليه ليه تحرموني من ضنايا كفايه، كفايه ابني

اللى راح السنة اللي فاتت، كفاية قلبى اللي انحرق وتعبنى عليه.. ارجوكم، اتوسل

إليكم، بلاش تحرموني من ابني الثاني، أكيد فى قلوبكم رحمة، أكيد فى قلوبكم

حنية أكيد عندكم ضنا وعارفين قد ايه الضنا غالى. حرام عليكم أنا أم، أم وأنتم

عارفين قلب الأم، بلاش بلاش تحرموني من ابني الثاني

**الأول :** (يصرخ) أنتم مستندين ايه، اهجموا عليها واخطفوا ابنها من حضنها  
**ميمونة :** (تتنهد) لا ، لا ، ابني لا  
**الأول :** اخطفوا ابنها غصب عنها  
**ميمونة :** لا ، بلاش تحرموني من ضنايا، وحيدى ، ابني حرام عليكم .تزداد حركات  
الحيوانات الغاضبة)  
**الأول :** (يمسك بندقية) اللي ح يتحرك من مكانه أنا ح ضرب في المليون  
**الجميع :** (يتراجعون) سلاح، سلاح  
**الأول :** كل حيوان يقف مكان ومش عايز اسمع صوت اخطفوا ابنها بسرعة من حضنها ،  
بسرعة بسرعة (يهجمون على ميمونة شد وجذب، تتعلق ميمونة بأقدامهم، تصرخ ،  
يأخذون ابنها تتلوى على الأرض يذهبون وهم يضحكون)  
**ميمونة :** (تبكى)  
(تغنى ، أغنية مناسبة)  
(يدخل الاسد خلفه الحمار يحمل جريدة)  
**الجميع :** الملك ، الملك  
**حيوان :** سمعت ياملك اللي حصل لميمونة  
**الاسد :** أنا عرفت كل حاجة  
**ميمونة :** خطفوا ابني الثانى ياملك  
**الاسد :** أنا عرفت ياميمونة  
**ميمونة :** لازم تتصرف وترجعلى ابني  
**الحمار :** (تكلمى مع جلالة الملك بأسلوب مهذب ياميمونة)  
**ميمونة :** هو ملك الغابة والمسئول عن حمايتنا  
**الحمار :** قصدك إيه  
**ميمونة :** الواضح أنه بيخطر علينا إحنا بس  
**الحمار :** عيب كده ياميمونة  
**الاسد :** سيبها يا جحش  
**الحمار :** ميمونة زودتها ياملك.. الملك اللي افضاله على الغابة كلها تقول عليه كده

ميمونة : اتصرف ياملك  
الأسد : الصبر ياميمونة  
ميمونة : لغاية امتى  
الأسد : الليلة، الليلة ياميمونة  
ميمونة : ابنى ح يرجع الليلة  
الأسد : ابنك وكل ولاد الغابة اللي خطفهم الانسان، كل الحيوانات اللي فى السيرك، اللي  
فى حديقة الحيوان، حتى الفراخ والديوك فى العشش، القطط والكلاب فى البيوت  
كل الحيوانات ح يرجعوا  
ميمونة : لكن ازاي  
الأسد : المسألة مش سهلة ومحتاجة للجهد والعرق، الجهاد الجهاد من أجل الحرية والامان  
الحمار : واحنا معاك ياملك  
الجميع : كلنا معاك ياملك  
الأسد : اقرأ ياجحش ، اقرأ مكتوب ايه فى الجرنال  
الجحش : (يقرأ) تحت عنوان اجتماع هذا العام ، يجتمع فى مساء اليوم وفى تمام الثامنة  
اطفال العالم الايتام مع الرجل الاول مسئول السلام  
حيوان : يعنى ايه الكلام ده  
حيوان : مالنا احنا بالاجتماع  
الأسد : الليلة الساعة الثامنة تعرفوا أنا اقصد ايه بالظبط ويعرف الانسان إنه  
الجميع : (غناء) مش ضعف منى يا انسان ولا قوة منك سطوة وشان  
أنا لحظة ما اشعر أنى مهان      تلاقينى رعد وبرق سيل براكين

(قاعة الاجتماع - أطفال العالم، من جميع الدول)

**تامر :** دلوقت ، بعد ما كل وفد دولة عرف مكانه فى الاجتماع أحب انبهكم لشيء مهم جدا،  
احنا هنا مجتمعين بصفتنا أطفال العالم الأيتام  
(بكاء وصراخ)

**تامر :** أنا عايز أفهم البكاء ح يفدنا فى إيه دلوقت

**طفل :** اعذرنا ياتامر، افكرنا بابا وماما، آه يابابا

**طفل :** مش ابوك هو اللي موت ابويا

**طفل :** وباباك أنت هو اللي موت بابى

**طفل :** وابوك أنت هو اللي موت بابا

(هكذا ..بين الجميع، حتى إننا نلاحظ أنها سلسلة تعود من حيث بدأت)

**تامر :** ارجوكم الهدوء... بالأسلوب ده مستحيل ح نواصل اجتماعنا ومش ممكن نحقق  
أهدافنا

**طفل :** معاك حق ياناصر

**تامر :** مش لازم نقلد الكبار فى كل حاجة. حتى اختلافهم فى الاجتماعات

**طفل :** معاك حق ياتامر

**تامر :** وبعدين احنا نحمد ربنا أن رجل السلام وافق على حضور الاجتماع

**طفل :** وهو يعني كان ح يرفض دعوتنا ليه

**تامر :** المسؤوليات

**طفل :** معاك حق ياتامر

**تامر :** الراجل ده مسئول عن امن الدنيا كلها

**طفل :** معاك حق ياتامر

**تامر :** علشان كده احنا لازم انهارد نكون ايد واحدة ونتكلم بلسان وقلب واحد، المسألة

مش سهلة المسألة محتاجة للجهد والعرق، الجهاد الجهاد من أجل الحرية والامان

**طفل :** احنا معاك ياتامر

**الجميع :** كلنا معاك ياتامر  
(صوت من الخارج)  
**الصوت :** رجل الأمن والسلام  
يدخل الرجل.. بين حراسة شديدة مدججة بالسلاح.. طيارات ، دبابات ،  
مدرعات  
(أغنية الترحيب)  
**تامر :** سيدى رجل أمن وسلام العالم، نتشرف ونرحب بحضرتك  
**الرجل :** اشكركم .وأننا فى غاية السعادة بهذه الدعوة من أطفال مهتمون بما يدور من  
أحداث  
**تامر :** اسمح لنا قبل بداية طرح الاسئلة ، إن نلفت نظركم بأن لنا اعتراض  
**الراجل :** اعتراض  
**تامر :** اعتراضنا علي دخول هذه الاسلحة قاعة الاجتماع  
**الراجل :** أنا مش فاهم قصدك ايه  
**تامر :** الاسلحة دى مكانها مش هنا  
**طفل :** هو ناسى أننا أطفال  
**طفل :** ومايصحش أننا نشوف الحاجات دى  
**طفل :** ياماما أنا خايف  
**طفل :** عمو ح يموتنى، عمو ح يموتنى  
**تامر :** سمعت حضرتك  
**طفل :** يعنى ايه  
**تامر :** الاسلحة تخرج خارج قاعة الاجتماع  
**طفل :** معاك حق ياتامر  
**الرجل :** محال أنا لا أمن على حياتى بدون وجود هذه الاسلحة  
**تامر :** ومحال أن يتم الاجتماع مع وجود هذه الاسلحة  
**طفل :** معاك حق ياتامر  
**الجميع :** لا للأسلحة، لا للأسلحة

الرجل : (يشير للحراس بالخروج) (خروج جميع الحرس)  
ودلوقت بعد خروج الاسلحة، ممكن تتفضلوا بطرح أسئلتكم علشان أنا ورايا  
مستوليات ومش فاضى  
تامر : واحنا مش ح نطول على حضرتك وأسألتنا جاهزة ومحدودة السؤال الأول  
طفل : يقف) (تصفيق) سيدي ، ممكن اسأل سؤال  
الرجل : قوى  
طفل : فين اللين؟  
الرجل : نعم؟  
طفل : فين اللين؟  
الرجل : بيقول ايه ده؟  
تامر : بيسأل عن اللين  
الرجل : اللين في الجاموسة  
طفل : أنا عايز لبن  
الرجل : لبن ايه؟  
طفل : نفسى أشرب لبن  
الرجل : اللين عندك روح واشرب  
طفل : أنا مش عندي لبن، عارف أنا عندي ايه؟  
الرجل : عندك ايه؟  
طفل : أنا عندي كساح.. عندي لين عظام.. عندي البرى البرى أنا عندي كل أمراض سوء  
التغذية، أنا عايز لبن  
الرجل : وأنا اجيب منين لبن دلوقت؟  
طفل : لا ح تقدر تجيب دلوقت ولا ح تقدر تجيب بعدين عارف ليه؟  
الرجل : لأ مش عارف  
طفل : علشان حضرتك لص  
الرجل : (ذهول) نعم  
(ضوضاء، صراخ، زعيق)

تامر : الهدوء يا جماعة  
 طفل : معاك حق ياتامر  
 الرجل : بيقول ايه ده؟  
 طفل : لص  
 تامر : مش كده  
 الرجل : الواد ده مجنون  
 طفل : أنا مجنون يالص  
 الرجل : خرجوه بره الاجتماع  
 طفل : مش خارج يالص  
 الرجل : خرجوه  
 تامر : الهدوء يا جماعة  
 الرجل : معاك حق ياتامر  
 طفل : تخطف من ايدى ثمن كوابية اللين؟  
 الرجل : ده ح يلبسنى قضية  
 طفل : ايوه، سرق منى اللين  
 الرجل : كداب  
 طفل : صادق ، صادق وعندى شهود كمان  
 الرجل : شهود، رحت فى داهية، هم فين؟  
 الجميع : كلنا شاهدين  
 الرجل : كلكم ، أنتم العصاية ، أنتم الأشرار  
 طفل : فين مصروفى؟  
 الرجل : ياابنى هو أنا اعرفك قبل كده  
 طفل : ايوه تعرفني، وكمان تعرف كل اخواتى المحرومين من اللين  
 الرجل : اخواتك كمان، والله أنا ما اعرف الواد ده  
 طفل : يعنى هو ح يتبلى عليك  
 طفل : اعترف، اعترف بالحقيقة

الرجل : أنا فين؟  
طفل : أيوه ، اعملهم علينا  
الرجل : طلعوا الواد ده بره  
طفل : مش خارج من هنا قبل ما اخذ حقى  
الرجل : وأنت ليك حقوق عندى  
طفل : مصروفى  
الرجل : يا ابنى هو أنا اخدت منك حاجة، هاه، هاه أنا اخدت منك حاجة يا حبيبي، أنا عمو  
عمو حبيبيك، أنا بقول عليك طفل مؤدب  
طفل : أنا مؤدب  
الرجل : أنا برضه بقول كده  
طفل : لكن عايز مصروفى  
الرجل : أنت قليل الأدب، هو فين مصروفك  
طفل : خطفته من ايدى، خطفت من ايدى ثمن كوباية اللبن واشترت بيه بندقية  
الرجل : طلعوه بره  
طفل : (يصرخ) خطف من ايدى ثمن كوباية اللبن واشترى بندقية  
الرجل : (يصرخ) طلعوه بره  
طفل : (يصرخ) خطف من ايدى ثمن كوباية اللبن واشترى بندقية (يخرج وهو مازال يردد)  
تامر : الهدوء الهدوء من فضلكم  
طفل : معاك حق ياتامر  
الرجل : أنا بعتذر عن استكمال الاجتماع  
تامر : احنا أسفين ونبعتذر لحضرتك  
الرجل : أن كانت كل الأسئلة بهذا الشكل أنا ح اعتذر واغادر الاجتماع فوراً  
تامر : تأكد حضرتك إن دى حالة استثنائية  
طفل : معاك حق ياتامر  
الرجل : طيب اتفضل واصل الأسئلة  
تامر : ارجوكم الهدوء علشان نقدر نواصل اجتماعنا



طفل : معاك حق ياتامر  
تامر : السؤال الثانى  
طفل : (يقف تصفيق) سيدى  
الرجل : نعم يا حبيبى  
طفل : سؤالى مش سؤال  
الرجل : بتقول ايه  
طفل : سؤالى مش سؤال  
الرجل : هو أنا ناقص  
تامر : وضح كلامك  
طفل : معاك حق ياتامر  
طفل : سؤالى مش سؤال لأنه طلب  
الرجل : طلب، قول كده من الاول ، أنا موافق  
طفل : موافق على ايه  
الرجل : الطلب  
طفل : مش تسمعه الاول  
الرجل : أنا موافق على طلبك من قبل حتى ما تطلب  
طفل : يمكن ما تقدرش عليه  
الرجل : أنت بتقول ايه، أنا اعجز عن تلبية طلب صغير لطفل صغير زيك، وبعدين أنت ح  
تطلب ايه يعنى، لعبة  
طفل : لا  
الرجل : كوره  
طفل : لا  
الرجل : عروسة ياعكروت  
طفل : لا  
الرجل : أمال تتطلب ايه  
طفل : بابا

الرجل : (مسرعاً) سهلة.. (يسترد) نعم  
طفل : وماما  
الرجل : نعم  
طفل : بابا وماما  
الرجل : يقول ايه ده  
تامر : عايز بابا وماما  
طفل : معاك حق يا تامر  
الرجل : هى ايه الحكاية.. أنا مين.. وأنتم مين  
تامر : اطفال العالم الايتام  
الرجل : مستحيل..أنتم اطفال العالم المجانين  
الجميع : احنا مش مجانين  
الرجل : قال ايه طفل عايز لبن، والثانى عايز بابا لاء لاء ومش بابا لوحده، بابا وماما  
طفل : عايز أب، وعايز أم  
الرجل : هو ده طلبك  
طفل : ايوه  
الرجل : أنت ياواد عايز ايه منى بالظبط  
طفل : عايز أب وعايز أم  
الرجل : أنت عايز تجننى  
طفل : عايز أب وعايز أم  
الرجل : أنت ليه مش فاهم  
طفل : عايز أب وعايز أم  
الرجل : حد يقوله حاجة  
طفل : عايز أب وعايز أم  
الرجل : ابعدوا المجنون ده عنى  
طفل : أنا مش مجنون، عايز أب وعايز أم  
الرجل : مجنون

طفل : مش مجنون  
الرجل : كلكم مجانيين  
الجميع : مش مجانيين  
الرجل : مجانيين  
الجميع : عايزين بابا.. عايزين ماما  
الرجل : الحقوني ، مجانيين  
الجميع : عايزين بابا ، عايزين ماما  
الرجل : خرجوني من هنا ، الحقوني ، الحقوني (أغنية)  
الجميع : اطفال العالم بتنادى ياكل أب ياكل أم  
حصدتم ليه اخضر فؤادى زرعتم جواه شوك اليتيم  
طفل : نفسى اقول بابا نفسى اقول ماما  
طفل : نفسى اقول بابا نفسى اقول ماما  
طفل : نفسى اقول بابا نفسى اقول ماما  
(يتردد هذا البيت.. بكل لغات العالم.. كل طفل بلغته بمفرده (على أن يراعى أنها  
صورة واحدة)  
الرجل : مجانيين ، أنا لو اعلم من الاول أنى ح جتمع مع اطفال مجانيين أنا لا كنت تعبت  
نفسى ولا جيت.. أنا أسف وبعذر وسوف اغادر المكان فورا  
تامر : احنا أسفين، حضرتك مش ح تقدر تخرج من هنا  
طفل : معاك حق ياتامر  
الرجل : يعنى ايه  
طفل : ممنوع الخروج ، اسألتنا كثيرة ومطالبنا اكثر  
الرجل : أنا مش ممكن اقعد هنا اكثر من كده  
طفل : واحنا مستحيل نسمح لك بالخروج  
الجميع : ممنوع الخروج، ممنوع الخروج  
الرجل : يعنى ايه حتخطفونى  
(يظلم المسرح لثوان) (بضاء المسرح)

(اختفاء الرجل)

الجميع : راح فين راح فينه

اتخطف، اتخطف، الضيف اتخطف

رجل الامن والسلام اتخطف

(حالة من الهلع والفزع تصيب الاطفال)

طفل : تامر، تامر، تامر ، تامر

تامر : نعم، افندم

طفل : أنا خايف خايف قوى ياتامر

طفل : احنا كلنا خايفين

طفل : نفتكر ح يعملوا معنا ايه لو الراجل ماقدرش يرجع

طفل : لا ، أنا مش مسئول عن اللي حصل

تامر : كلنا مسئولين عن اللي حصل

طفل : معاك حق ياتامر

طفل : قلت أنا مش مسئول عن أى حاجة، وزيادة في الاحتياط أنا مروح البيت

تامر : استنى عندك يا عيل

طفل : بس بلاش تقول عيل

تامر : عايز تهرب من الموقف

طفل : الموقف ده أنا مش مسئول عنه

تامر : دلوقت عايز تهرب

طفل : أmaal يعنى اعمل ايه

طفل : صحيح ياتامر، احنا ح نعمل ايه دلوقت

تامر : ننتظر أكيد ح يتصلوا بينا

طفل : هم مين

الرجل : اللي خطفوه

طفل : ح يتصلوا امتى

تامر : مش عارف

طفل : ح يتصلوا بالتليفون  
تامر : مش عارف  
طفل : ح يزورنا هنا  
تامر : مش عارف ، مش عارف أى حاجة  
(يدخل الحمار يرتدى بدلة أنيقة ، نظارة في يده شنطة)  
الحمار : بلاش الحيرة ياتامر  
تامر : مين  
الجميع : مين أنت مين  
الحمار : أنا مندوب جلالة الملك  
الجميع : (ضحك) هاهها الملك ، الملك  
الحمار : أيوه الملك  
الجميع : (يزداد الضحك) بتقول الملك  
(يقدم فى صورة استعراض)  
الحمار : مين يرفع صوته لفوق  
الجميع : دخلك ايه أنت  
الحمار : اتكلم ويايا بنوق  
الجميع : تطلع مين انت  
الحمار : أنا مندوب الملك (يخلع النظاره)  
الجميع : الحمار ، الحمار  
والله اخترت صحيح ياملك مندوب محتاج لزمبلك  
الحمار : يظهر أني هنا متهان  
الجميع : وسع داحنا عيال جدعان  
الحمار : شوية اطفال كده طايشين  
الجميع : ايه اللى جايك هنا يا بيهم  
الحمار : جاى علشان البنى آدميين الغايبين منهم والحاضرين  
يطفونا رقايدة سنين ويعيشوا فى سلام امنين

الحمار : جاى علشان الكل في واحد نبقى ايد واحدة ونتعاهد

لا نعادى ولا نجرى نساعد مين يرفع راية التدمير

الجميع : مين يرفع راية التدمير

والله دى عيبه فى حقنا وكسوف واضح فى وشنا

خجلنا من روحنا كثير لكن محتاجين تفسير

لكن محتاجين تفسير

(نهاية صورة الاستعراض)

الحمار : أنا أسف جدا على التأخير . كان مفروض اوصل عندكم من بدرى

تامر : وايه اللي أخرك

الحمار : المواصلات.. المواصلات عندكم صعوبة قوى، ساعة علشان اركب الاتوبيس وكل

ما اوصل واركب يقولولي انزل يا

تامر : اتكلم وخلصنا أنت مين

الحمار : ما قلت مندوب الملك

الجميع : الملك ، الملك

الحمار : اسمعوني، أكيد بتسألوا نفسكم، أنا جاى دلوقت علشان ايه وأنا أحب أريحكم

واقولكم أنا جاى اطمنكم على الراجل

الجميع : دخلك ايه أنت

تامر : أنت تعرف مكانه

طفل : هو هرب عندكم

الحمار : الرجل لم يهرب يا أطفال

تامر : آمال عندكم بيعمل ايه

الجميع : اتكلم ، قول الراجل عندكم بيعمل ايه

الحمار : نحن جماعة الاسد المرعب نعلن مسئوليتنا عن اختطاف رجل الامن والسلام

الجميع : اختطاف، اختطاف

الحمار : ولنا شرطين من الأجل الافراج عنه

تامر : شروط

الحمار : قلت شرطين اثنين  
تامر : شروطكم ايه  
الحمار : الشرط الاول  
تامر : اتكلم بسرعة  
طفل : معاك حق ياتامر  
تامر : اسكت انت. قول يا حمار الشرط الاول  
الحمار : الافراج عن جميع الحيوانات  
تامر : نعم  
الحمار : افكر أن كلامى واضح  
تامر : أنت مين  
الحمار : مندوب الملك  
تامر : ملك ايه  
الحمار : ملك الغابة  
تامر : وعايذ ايه  
الحمار : الافراج عن جميع الحيوانات ، فى السيرك فى الحديقة فى الافلام ، فى المسرحيات ، فى العشش فى البيوت، الافراج عن كل الحيوانات  
طفل : أنا مش فاهم أى حاجة، فى حد فاهم، أنت فاهم ياتامر  
تامر : اسكت علشان نسمع باقى الشروط ايوه، الشرط التانى  
الحمار : الشرط التانى يؤجل لحين تنفيذ الشرط الاول بعد اذنكم (يخرج)  
طفل : عرفت ياتامر هم مين؟  
تامر : مش مهم دلوقت هم مين المهم هم طلبوا ايه احنا لازم نتحرك بسرعة علشان ننفذ الشرط الاول وننقذ الراجل.. والحمد لله احنا هنا وفد من كل دول العالم، كل وفد يرجع بلده ويحاول تنفيذ الشرط الاول  
الجميع : وهم طلبوا ايه بالطبط  
تامر : طالين .. الحرية.

(الغابة.. رجل السلام مقيد في جذع نخلة)  
الرجل : (يصرخ) سرقة.. خطف .. نهب.. شغل اونطه.. العالم مش ممكن يصمت عن هذا  
العمل الاجرامى.. كلها ساعات والغابة دى تنقلب عليكم  
الاسد : أنت بتزعق ليه  
الرجل : أنا باتكلم زى ما انا عايز  
الاسد : لا .. الكلام هنا ممنوع الا بعد إذن منى  
الرجل : إنت مين أنت  
الحمار : اتكلم بادب مع الملك  
الرجل : ملك  
الاسد : أنا الملك  
الحمار : مش عاجبك  
الرجل : لا مش عاجبني  
الحمار : اضربه ياملك  
الرجل : تضربنى؟!  
الاسد : أنا هنا الملك والكل تحت امرى  
الرجل : أنتم عايزين منى ايه  
الاسد : منك أنت مش عايزين أى حاجة.. احنا بلغنا الشرط الاول من شروطنا لجميع دول  
العالم.. وانت عارف بقى لو رفضوا التنفيذ  
الرجل : ح يجرى ايه؟  
الحمار : ما تستنى يا جحش مستعجل ليه  
الاسد : الساعة كام دلوقت يا جحش  
الحمار : الساعة دلوقت اربعة إلا خمسة  
الرجل : خلاص هو ده الميعاد، ح تكلونى دلوقت  
الاسد : لا ، لسه، خمس دقائق بينك وبين الموت



**الرجل :** ده حرام، ظلم، أنا عايز أعيش، مش عايز أموت  
**ميمونة :** معقولة دي.. أنا مش قادرة اصدق  
**حيوان :** فى ايه ياميمونة  
**ميمونة :** يعد خمس دقائق ح قابل ولادي الاثنين، ح ضمهم فى حضنى  
**حيوان :** ايوه ياميمونة، الساعة أربعة بالضبط ح يفرج عن كل الحيوانات هو ده الميعاد اللي  
بلغوا بيه ملك الغابة  
**غزالة :** وأنا.. أنا ح شوف خطيبى، خطيبى غزال وحشنى قرى ياغزلان  
**ميمونة :** انهاردة تقابليه ياغزالة  
**غزالة :** يارب ياابلة ميمونة يارب  
**الديك :** وأنا أنا زوجتي الفرخة ح ترجع، أنا زوجتى وحشتنى قوى  
**الديب :** (فى جانب) يانهار.. دلوقت الحيوانات كلها ح ترجع ويفرج عنهم ويبعدى أنا اللي  
بعث كل الحيوانات ، أكيد أصحابها ح يطالبونى برد الفلوس ، لكن أنا أجيب مدين  
الفلوس، دي كلها اتصرفت علي الهلس، ضاعت على شرب السجاير ودخول  
السينما والفرجة علي البط البكيني  
**ميمونة :** باقى قد ايه من الوقت ياجحش  
**الحمار :** اسمعى ياميمونة، الساعة بتدق أربعة بالضبط  
(صوت الساعة)  
**ميمونة :** الساعة أربعة، ولادى  
**الجميع :** الساعة أربعة، الساعة اربعة  
(فترة ترقب وانتظار)  
**ميمونة :** مافيش حد ظهر، مافيش حد رجع، ولادى فين  
**الحمار :** الصبر ياميمونة  
**ميمونة :** الراجل ده كداب، كله، كله ياملك  
**الرجل :** ياكلني يعنى ايه، خلاص الدنيا بقت غابة والقوي ياكل الضعيف  
**الاسد :** أنت تسكت خالص، خمس دقائق لو مظهرش أى وفد من الحيوانات المفرج عنهم..  
أنت عارف اللي ح يجرى عليك..

العمار : أنا مستعد اكله ياملك  
(الجميع عيونهم علي مدخل الغابة)  
(أغنية)  
الجميع : ح ناكل مين انهارد ح ناكل مين انهارد  
العمار : اكله ظريفة خفيفة مفيدة للمعدة  
الرجل : ياولادى عيب عليكم  
الجميع : (يضحكون) .. ها ها ..ها .. بيقول علينا ولاده  
الرجل : أنا برضه زى ابوكم  
الجميع : (يضحكون) .. ها ..ها ..ها ... بيقول على نفسه ابونا  
ح ناكل مين انهارد ح ناكل مين انهارد  
الرجل : فاكرنها ساييه ولحمى رخيص  
الجميع : ح نلف عظمتك فى قراطيس  
الرجل : أنا لحمى مر وصعب عويص  
الجميع : معدتنا زلط اكس بريس  
ح ناكل مين انهارد ح ناكل مين انهارد  
ح ناكل مين انهارد  
حيوان : (يدخل) الحيوانات وصلت،الحيوانات المفرج عنها وصلت  
(دخول مجموعة مختلفة من الحيوانات)  
(زغاريد ، تهاني، افراح)  
ابن ميمونة : هالو مامى  
ميمونة : مامى ده ايه .. أنا أملك ياقرء  
ابن ميمونة : ايه أملك دى .. أنتي مش تتنجرى شوية  
ميمونة : انتجر  
ابن ميمونة : ايوه وكفاية ألفاظ سوقية  
ابن ميمونة : أنا عايز اشرب ياماما  
ميمونة : اتفضل يا حبيبى

ابن ميمونة : ايه ده، ميه من الحنفية، هوما فيش عندكم كولدير

ميمونة : كولدير

الغزالة : غزال فين، كفارة يا غزال

الغزال : مين الغزالة

الغزالة : إيه يا غزال، نسيتني، نسيت الغزالة، خطيبتك

الغزال : خطيبتي لا ، ده كان زمان

الغزالة : شفت ليك شوفة في البندر يا خايب

الغزالة : بصراحة أنتي دلوقت مش من مستوايا

الديك : فرختي، زوجتي، حمد الله علي السلامة

الفرخة : ازيك

الديك : ازيك ، كده من بعيد، تعالي هنا

الفرخة : لو عايزني تعالي انت

الديك : اجي أنا

الفرخة : مش أنت اللي عايزني

الديك : لكن أنا الديك

الفرخة : وأنا الفرخة

الديك : أنا ديك العشة

الفرخة : وأنا فرخة العشة

الديك : أنتي يتردى عليه

الفرخة : وما اردش ليه

الديك : أنا الديك وانتى الفرخة

الفرخة : اصحى ياديك، خلاص مافيش فرق بين الديك والفرخة المساواة يا حبيبي.. عن

إذنك

الديك : رايحة فين..

الفرخة : رايحة الشغل

الديك : وشغل العشة

م ٦ - رحلة كمبيو وليه يا أسد

**الفرخة :** اشتغل أنت بقي، أنا زبي زيك  
**الاسد :** خدى هنا ياقطة  
**القطه :** عايز ايه يا اسد  
**الاسد :** اسد كده من غير القاب  
**القطه :** ألقاب ، ما خلاص الالقاب اتلغت من زمان  
**الاسد :** ايه اللي حصل، جري ايه في الدنيا  
**حيوان :** (يدخل) جلالة الملك، ملك الغابة، الاسد المرعب  
**الاسد :** فيه ايه  
**حيوان :** وفد من الاطفال طالين المقابلة  
**الاسد :** ايوه، دى اللجنة المسئولة عن الاشراف على عملية التسليم يدخلوا فوراً  
**حيوان :** اتفضلوا .. اذن جلالة الملك لكم بالمقابلة  
(دخول ثلاثة اطفال)  
**تامر :** السلام على ملك الغابة  
**الاسد :** أهلاً ومرحباً، الغابة نورت  
**طفل :** الغابة منورة بوجودك يا ملك الغابة يا مرعب  
**الاسد :** أحب قبل أي كلام افكركم (مقاطعة)  
**تامر :** احنا فاكرين ومش محتاجين لاي كلام، وتأكد أن ما في حد يعرف أنتم مين ولا فين  
**الاسد :** عظم دلوقت تقدر تتكلم  
**تامر :** افكر أن الموضوع انتهى، احنا نفذنا الشرط وافرجنا عن كل الحيوانات، باقى أنك  
يا ملك تنفذ الجزء الخاص ببيكم من الاتفاق وتسلمنا الرهينة  
**الاسد :** بالبساطة دى نفرج عنه  
**طفل :** يعنى ايه يترفض تسلمنا الرجل  
**طفل :** كذب وغش ونفاق  
**تامر :** إحذر يا ملك غدر الانسان، أنت لم تقرأ جرايد اليوم  
**الاسد :** فيها إيه الجرايد  
**تامر :** (يقرأ) مكافأة مليون جنيه لمن يرشد عن مكان المخططفين

الديب : (يخطف الجريدة) مليون جنيه  
الاسد : ناويين تبلغوا عنى  
تامر : احنا بنطالبك بتسليم الرجل  
الديك : ده صحيح، مليون جنيه، مليون جنيه(يخرج)  
الاسد : انتم ناسيين أن في شرط تانى  
تامر : شرط تانى، عايز ايه بعد الحرية؟  
الاسد : الحرية وحدها لا تكفي  
تامر : أنت ح تتفلسف ياملك  
الاسد : هى دي الحقيقة  
تامر : وضع كلامك ياملك.. أنا مش فاهم تقصد ايه  
الاسد : أنا دلوقت ح فرجك علشان تعرف تساوى ايه الحرية من غير الامان، اتفرج  
يا انسان، ودى حرية من غير أمان  
(شريط مصور على شاشة يظهر بعض ما يحدث لاطفال العالم الثالث من تجويع  
وتشريد وموت)  
تامر : أنت كده بترفض الافراج عن الرجل  
الاسد : بالعكس أنا ح فرج عن الرهينة  
تامر : امتى ياملك  
الاسد : بعد ما يتحقق الامان لحريرتنا  
طفل : وازاى يتحقق الامان  
الاسد : بالسلام  
الجميع : وازاى يتحقق السلام  
الاسد : بتدمير كل الاسلحة  
الجميع : تدمير الاسلحة

(الغاية.. يدخل بائع الجرائد)

حسن : اقرأ الجرايد.. اختطاف رجل الامن والسلام.. جماعة الاسد المرعب تعلن  
مسئوليتها عن الحادث.. وتعلن شروطها بتدمير اسلحة الدمار.. اقرأ الجرايد

الوردة : استنى يا حسن أنا عايضة الجرنال

حسن : إيه ياوردة؟.. إنتى ناوية تقرى الجرنال؟

الوردة : أيوه يا حسن.. من فضلك ناولنى الجرنال بسرعة

السمكة : مالك ياوردة مستعجلة وعايضة تقرى الجرنال بسرعة

الوردة : انتى ما سمعتيش .. حسن كان بينادى ويقول ايه

السمكة : لا.. ما اقدرش اسمع.. أنا لسه خارجة من الحمام

الحمام : حمام الهنا ياسمكة؟

السمكة : مرسى ياحمامة

الحمامة : لكن هو ايه الخبر اللي عايضة تسمعيه

السمكة : أهى وردة معاها الجرنال تقرا وتسمعنا

الوردة : الخبر بيقول أن الاسنان ح يدمر كل الاسلحة

الضفدع : (يضحك)

الوردة : بتضحك على إيه يا ضفدع

الضفدع : حتى أنتى كمان يا شجرة يا عجوز

الشجرة : وليه نكذب الخبر يا ضفدع

الضفدع : ما انتى عارفة يا شجرة أنه كلام جرايد

الشجرة : أنا الشجرة الجدة العجوز.. ومن تجربتى الطويلة اقول أن الخبر صحيح

السمكة : ياريت يا شجرة يكون حقيقى

الوردة : احنا خلاص تعبنا من قلة وغياب الامان

الحمامة : ومحتاجين للحب.. محتاجين للسلام

الوردة : مين بيتكلم عن الحب والسلام

**الحمامة : أنا الحمامة**  
**الوردة : أكيد أنتي يا حمامة..** ومين غيرك يتكلم عن السلام  
**الصفدع : معاكى حق يا وردة، حمامة طول عمرها عايشة فى الاحلام**  
**الوردة : ياريت نقدر نحلم زيتها يا صفدع**  
**الشجرة : وليه نحلم يا وردة واحنا نقدر نساعد ونشارك علشان حلمنا يصبح حقيقة علشان**  
**بكره يكون احلى من النهارده**  
**الوردة : معاك حق يا صفدع، طول ما فى اللي بيقطع الورد ويرميه على الارض**  
**السمكة : وطول ما فى اللي بيلوث المياه بالقاذورات والمبيدات**  
**الشجرة : وطول ما فى اللي بيخلع الشجر الاخضر من مكانه**  
**الحمامة : وطول ما فى اللي بيصطاد حمام السلام**  
**الوردة : وطول ما فى اللي بيقتل الورد**  
**القمر : (يدخل) وطول ما فى اللي بيحب نفسه ويكره غيره**  
**الوردة : مين القمر**  
**القمر : أيوه ، أنا القمر**  
**السمكة : أنت كمان يا قمر بتعاني من غياب الامان**  
**القمر : أنتم ناسيين أنى مخلوق من خلق الله، وربنا خلق الخلق كل الخلق علشان يعمرؤا**  
**الارض مش يفسدوها**  
**الشمس : (تدخل) معاك حق يا قمر**  
**الجميع : مين الشمس**  
**الصفدع : حاجة غريبة، الشمس والقمر مع بعض**  
**الشمس : أنا ما قدرتش استنى لحد الشروق وقلت لازم احضر الاجتماع**  
**الشجرة : احنا كلنا مجتمعين هنا واجب علينا نعمل حاجة ونشارك الاطفال**  
**الوردة : وتفتكرى يا شجرة يا جدة يا عجوز.. نقدر نعمل ايه**  
**الشجرة : أول شىء نعمله، استفتاء، ناخذ رأى الجميع**  
**الوردة : ما احنا كلنا رأى واحد وهو فى حد رافض السلام**  
**الشجرة : كل فرد يجاوب عن نفسه، انتي يا وردة**

الوردة : نفسى البراعم تفتح وتزهر  
الشجرة : والسمة  
السمة : نفسى اعيش في مياه نظيفة مش ملوثة  
الشجرة : وأنت ياسى القمر  
القمر : عايز أنور.. انور للأحباب بس  
الشجرة : والشمس  
القمر : نفسى اشرق على أرض الخير والحب والسلام  
الشجرة : وأنا الشجرة نفسى اخضر وازين بلونى الارض  
الضفدع : شوفى يا شجرة ، شوفى مين اللى جاى هناك  
الشجرة : الديب  
القمر : هو الديب رايع فين  
الشجرة : أهلا ياديب علي فين رايع  
الديب : واصل مشوار مهم يا شجرة  
الشمس : ايه اللى فى ايدك ده ياديب مش ده الجرنال  
الديب : هو الجرنال يا شمس وسيبوني وكفاية عطلة  
الضفدع : تبقى قرية الخبر ياديب  
الديب : ايوه قرية الخبر  
الحمام : ومستعجل كده ليه ياديب  
الديب : سيبيني يا حمامة.. أنا مش فاضى  
الحمامة : احنا كمان قرينا الخبر ومش فاضيين ومستعجلين  
الديب : قرية الخبر ..يبقى أنا لازم اسبقكم كلكم  
الشجرة : بتقول ايه ياديب  
الديب : لا ، لا ، ولا حاجة يا شجرة  
الشمس : ياديب ، أنت مش ناوي تشترك معنا  
الديب : قلت أنا مش فاضى  
القمر : أنت مش بتقول أنك قرية الخبر



الديب : أيوه ، قرئت الخبر، تحب أقرأ الخبر تانى اسمع يا قمر مكافأة مليون جنيه لمن  
يكشف مكان المخططين  
القمر : احنا مش قصدنا الخبر ده  
الديب : هو فيه خبر تانى  
القمر : أيوه، اسمع يا ديب  
الديب : أنا مش فاضى اسمع وكفاية عليه الخبر ده. يخرج)  
الحمام : هو الديب رايع فين  
الشجرة : خيلنا احنا فى شغلنا  
الضفدع : واحنا دلوقت ح نعمل ايه  
الشمس : نشارك ، نشارك الاطفال ونساعدهم ونطالب بالحب والسلام  
الجميع : معاكي حق يا شمس  
الشمس : عايزين الحب  
الجميع : عايزين الحب  
الشمس : عايزين الامان  
الجميع : عايزين الامان  
الشمس : الحب و الامان  
الجميع : الحب و الامان

(الغابة.. الديب يسير مسرعاً)

القمر : رايح فين ياديب

الديب : مين..مين اللي بينادى عليه

القمر : أنا القمر

الديب : لا مؤاخذة يا قمر.. أنا مستعجل ومش فاضى

القمر : استنى عندك ياديب

الديب : عايز ايه يا قمر.. انت ناوى تأخرنى

القمر : أأخرك عن ايه

الديب : عايز إيه با لظبط منى يا قمر

القمر : أنت رايح فين

الديب : مش شغلك

القمر : عيب ياديب ولعلمك أنا عارف أنت رايح فين

الديب : عارف

القمر : ومش أنا لوحدى اللي عارف كلنا عارفين

الديب : الكل عارف.. رحت في داهيه ياديب

القمر : خايف ياديب

الديب : الديب مش جبان

القمر : تبقى مكسوف

الديب : انكسف من ايه

القمر : تحب اقولك انت ناوى على ايه

الديب : قول .. أأما تقولش

القمر : أقول ولا ما اقولش

الديب : أنت عايز ايه يا قمر

القمر : ارجع

الديب : محال  
القمر : المحال اللى أنت بتفكر فيه  
الديب : أنت دخلت جوايا وعرفت أنا بفكر فى ايه  
القمر : ما تعرفش أنى أقدر اقرأ أفكارك  
الديب : حكيم روحانى حضرتك  
القمر : قمر الليالى ياديب.. ارجع ياديب  
الديب : مستحيل ارجع.. دول مليون جنيه  
القمر : ومستحيل اسمحك ترتكب الجريمة دى  
الديب : جريمة  
القمر : أيوه.. عايز تقتل الحب والامان  
الديب : سبني يا قمر.. دول مليون جنيه  
القمر : مستحيل اسيبك تكشف عن المكان  
الديب : وانت بقى يا قمر اللى تقدر تمنعنى  
القمر : أيوه ياديب.. اقدر امنعك  
الديب : القمر يقدر على الديب، هاهاها وياترى ح تمسك فيه ولا تضربنى  
القمر : لا ح مسك فيك ولا ح ضربك  
الديب : امال ازاي تقدر تمنعنى  
القمر : مش ح نورك  
الديب : بتقول ايه  
القمر : الدنيا تبقي ظلمة حواليك وما تعرفش توصل مكانك  
الديب : اعقل يا قمر  
القمر : القمر عمر نوره ما كان للخائن  
الديب : نقسم المكافأة بالنص يا قمر  
القمر : محال انور للخائن  
الديب : (يصرخ) بلاش يا قمر، أنا مش فاضي يا قمر، بلاش يا قمر  
(يختفي القمر ظلام)

الديب : ولا يهمنى أنا ح أنتظر وصول النهار وطلوع الشمس تنور الدنيا واقبض المكافأة  
لوحدى هاهاا (يضحك ويغنى)  
(ظهور الشمس)  
الديب : الحمد لله.. النهار طلع  
الشمس : رايح فين يادي  
الديب : مين  
الشمس : أنا الشمس  
الديب : سيبنى يا شمس مش كفاية القمر أخرنى  
الشمس : ياريت سمعت كلام القمر يادي  
الديب : القمر ده مجنون ده بيطلب منى اضيع من ايدى مليون جنيه  
الشمس : اسمع كلامه  
الديب : حتى أنتى يا شمس وأنا اللي كنت فاكر الشمس عاقله  
الشمس : اعقل أنت يادي واسمع الراى السليم  
الديب : قصدك الراى الغلط، لمصلحة مين  
الشمس : مصلحة الجميع  
الديب : ومصلحتى أنا  
الشمس : الواحد مش بنفسه، الواحد بالمجموع  
الديب : الديب محال يفهم الكلام ده  
الشمس : أنت يادي أنت تقدر تعيش لوحدك من غير مساعدة  
الديب : أنا مش محتاج أى مساعدة من أى فرد  
الشمس : يعنى أنت مش محتاج مساعدتى  
الديب : قصدك ايه  
الشمس : اغرب عنك  
الديب : واعيش فى الظلمة  
الشمس : ولا تشعر بالدفء  
الديب : أموت من البرد

الشمس : عرفت ياديب أننا كلنا محتاجين لبعض لأننا كلنا بنكمل بعضنا  
الديب : وعايذه ايه منى دلوقت ياشمس  
الشمس : تشارك الجميع  
الديب : هو ده رأى الجميع  
الشمس : حتى اسألهم بنفسك ياديب  
العصفور : ارجع ياديب علشان العصافير تعيش فى حرية وأمان  
الديب : مش راجع  
السمك : ارجع ياديب علشان الميه تبقى نظيفة مش ملوثة  
الديب : لازم ابلغ  
الوردة : ارجع ياديب لجل ما الزهر يفتح والبرعم يكبر  
الديب : مش ح رجع  
الشجرة : ارجع ياديب لجل ما الارض تخضر  
الديب : لازم ابلغ  
الشمس : ارجع ياديب لجل ما أشرق على أرض الخير والحب  
الديب : مش ح رجع  
الجمس : ارجع ياديب، ارجع ياديب  
الديب : لا ، مش ح رجع لازم ابلغ  
(اظلام)  
الديب : مستحيل النهار النهار راح فين احنا لسه فى ساعة الشروق  
الشمس : أنا طفيت نوري ياديب  
الديب : القمر قبلك طغى نوره عنى ياشمس  
الشمس : النور عمره ما كان طريق الخاين  
الديب : لا مش ح رجع مش ح رجع لازم ابلغ لازم اقبض المكافأة، مليون جنيه مليون جنيه  
(يدخل رجل على هيئة غامضة خلف شاشة بيضاء حتى يظهر مثل الخيال)  
ميمونة : تامر تامر شوف يظهر أن هو ده ميعاد القرار  
تامر : معاكى حق ياميمونة هو ده المسئول عن القرار

القمر : نفتحك يا تامر وافق على تدمير الاسلحة  
الحمامة : وهو فى حد يرفض السلام  
تامر : أنا مش عارف هو وافق ولا لا  
الشجرة : أحننا مش فى كده دلوقت  
تامر : قصدك ايه يا شجرة يا جدة يا عجوز  
الشجرة : أنتم نسيتم  
تامر : معاكى حق يا شجرة.. الديب الديب مش لازم يوصل مش لازم يبلغ مش لازم يكشف  
المكان  
الشمس : أيوه، لازم لحد صدور القرار  
تامر : أيوه يا شمس والقرار ليه اشارة محددة لحظة صدور القرار النور ح ينطفى  
الحمامة : وبعدين النور ينور تانى  
تامر : لو نور أخضر  
الحمامة : تبقى سلام  
تامر : ولو نور أحمر  
الشجرة : لا ، ما تقولش يا تامر، انشاء الله النور ينور أخضر  
الديب : أنا مش شايف أى حاجة لكن ولا يهمنى لازم اوصل واكشف عن المكان لازم ابليغ  
(يقع على الارض) مين من اللى واقف فى طريقى  
الشجرة : أنا الشجرة  
الديب : ابعدى عن طريقى يا شجرة  
الشجرة : محال ابعده عن طريقك يا ديب  
الديب : لازم اوصل يا شجرة، ابعدى عن طريقى  
(يصرخ) ايه ده، ايدى بتنزف دم مين اللى جرحنى  
الشوك : أنا اللى جرحتك يا ديب  
الديب : أنت مين  
الشوك : أنا الشوك  
الديب : حتى أنت كمان يا شوك

الشوك : الجميع رأى واحد ياديب  
 الحماية : الجميع محتاج للحب والامان ياديب  
 الديب : يا شمسي نوري يا شمسي الشوك جرحني في ايدي يا شمسي  
 الشمس : ارجع ياديب وأنا انور طريقك  
 الديب : مستحيل ارجع  
 الشمس : وأنا مستحيل اهدى نوري للخائن  
 الديب : يا قمر يا قمر نور طريقى يا قمر  
 القمر : ارجع ياديب وأنا انور طريقك  
 الديب : لازم ابلغ واقبض المكافأة  
 القمر : وأنا مستحيل اهدى نوري للخائن  
 الديب : (يصرخ) أه أه مين اللي قرصني في رجلى  
 الدودة : أنا ياديب  
 الديب : انتي مين  
 الدودة : أنا الدودة ياديب  
 الديب : حتى انتي كمان يادودة مفعوضة الجميع الجميع اتفق على الجميع واقف في  
 طريقى  
 الشمس : اقف معنا ياديب  
 الديب : طريقنا مختلف يا شمسي  
 الجميع : ارجع ياديب ارجع ياديب ارجع ياديب  
 الديب : مش ح رجع مش ح رجع و(يختفى)  
 ميمونة : هو القرار اتأخر كده ليه  
 تامر : المسألة مش سهلة ياميمونة  
 ميمونة : مش سهلة ليه  
 الشمس : دى لازم يكون فيها بحث ودراسة ومناقشات  
 القمر : مناقشات على مستوى القمر  
 ميمونة : هو مش مضيعنا إلا مناقشات القمة دى

الضفدع : أنا مش قادر أكثر من كده الانتظار ح يجننى

ميمونة : الانتظار والقلق شىء مخيف

الضفدع : خلاص مش قادر مش قادر

تامر : اعقل يا ضفدع

الضفدع : هو ساكت ليه بيلعب بينا ولا ايه

الشمس : اعقل يا ضفدع

الضفدع : ابعدوا عنى، لازم يتكلم لازم يتكلم

القمر : اعقل يا ضفدع

الضفدع : اتكلم ساكت ليه، اتكلم اتكلم اتكلم

(النور ينطفىء اظلام)

الجميع : الشارة الاشارة

تامر : لحظة واحدة، دلوقت النور ح ينور تانى

ميمونة : ياترى النور ح ينور بلون ايه

الجميع : الاخضر الاخضر الاخضر

(ترى شبح الديب خلف الشاشة مع شبح الاسد)

الجميع : تامر تامر

شايف مين هناك

الدبيب الدبيب

وصل الدبيب وصل الدبيب

اكيد ح تتكلم

ح يبلغ ويكشف المكان

ويقتل الحب

يقتل الامان

تامر : لا ، مش ح يقدر يقتل الحب ولا الامان الحب عمره حايموت ولا الامان ما تخافوش

حتى لو اتكلم الدبيب

ميمونة : قصدق ايه تامر



تامر : حتى لو اتكلم الديب.. هو ده الاختيار اختيار النوايا.. لو كانت النية خالصة للسلام  
لو كانت دعوة الانسان للسلام حقيقية ومش مجرد شعارات وكلام هى الفرصة  
قدامك يا انسان  
(النور)  
الجميع) : النور نور  
ده مانورش اخضر  
تامر : وكمان مانورش أحمر

رقم الايداع: ٢٠٠١/١٠٠٨٩٠ع

شركة الأمل للطباعة والنشر  
(مورافيتلي سابقاً)